

JESUSPITA JUAN ISQUIRBINGAN

Naupataga shumag tantianayag uchuclata niyushay Juan imanir cay libruta isquirbingantas. Juanga cara Jesuspa cachran ruragmi. Payga aliscam purisha Jesuswanga, nätan chay purinan wichan Juanga cara mözularan. Payga quiquinmi niyan Jesuspa alisca cuyaynin cangantas. Chaura chaypam musyayanchi Jesusta ricapungantas, jinaman paypita imata shumag musyangantas. Chaypita Tayta Dioscagta Jesús nä jegaruptinga, Juanga achca runatam willapacura Jesuspita. Chaura achcam runaga Jesusman yupachicuyta galayapäcusha. Juanga cay libruta isquirbira Jesús aywacungan nä 20 watanuy cayaptinran. Jinarcurmi cay libruchrüga willapayämanchi achcata Jesuspitaga. Payga cay libruchru “Jesusga cara Diospa-mayinmi” niyämanchim, jinamanmi niyämanchi lapan runacunapa truncan Jesús wanunganpita, nätan payman yupachicurga, payta cäsucurga paywan imay imaycamas cawacunanchipita. Cay libru isquirbiyta nä usharurga Juanga apachira juclä nacionchru Jesusman yupachicugcunapagmi. Paycunaga rimapäcug griegopam. Chaymi Juanga isquirbira griego rimaychru.

Chaura Juanga cay libru isquirbiyta galayura cay nirmi:

1 ¹Mana imas camacaptlanmi payga nä cayara. Payga cara Dioswanmi. Nätan Payga cara Diosmi. ²Ima-aygas mana camacaptlanmi, payga nä cayara Tayta Dioswan.

³Lapan ima-aygatas rurara paymi. Nätan mana pay ruraptinga manam imas ruracanmanchu cara. ⁴Paymi cara cawachicug. Nätan chay cawachicugmi runacunapag cara juc achquinuysi Tayta Diospita shumag musyachimagninchi.

⁵Chay achquinuysi cayagmi tantiyächin yanauyagchrünüysi jucachru cawacayagcunata, nätan chaytam chay jucächucuyagcuna mana chrasquicurchashachu.

⁶Chauraga cara juc runa Juan jutiyog, Tayta Diospa cachran rurag. ⁷Payga cara chay achicyagnuysi cayagpita

razoncagta willamagninchim, pay rimanganta lapan chrasquicurchänapag.

⁸Juanga manam chay achquinuysi cayagchu cara, antis payga cara chay achquinuysi cayagpita musyachimaglanchim.

⁹Nätan lapan runacunata chay achquinuysi razoncagta tantiachicugga nämi reguechicuggag cayara cay pachachru. ¹⁰Payga nämi cayara runacunawan, nätan runacunata pay rurarayaptinsi, chay runacunaga manam reguepäcushachu. ¹¹Payga aywamura Israel castancunamanmi. Jinarcurmi paycunaga mana pasay chrasquiyta munapäcushachu. ¹²Nätan payta chrasquicurchur yupachicugcunataga lapantas “Cananpita gamcunaga nä carcayanqui Diospa castanmi” niruram.

¹³Nätan paycunaga Diospa castanman muyupäcusha manam runapita näcimuypachu, manam quiquin cayta munarchu. Manatan ni pi runas munaptinpushu, antis Dios munaptinmi.

¹⁴Nätan payga muyurura runamanmi. Jinarcurmi yachrara noganchicunacagchru. Nogacuna ricapäcurä shumagmi Tayta Diospa-mayin chay japalan Diosta, jinaman munayninwan ima-ayga ruragtas. Payga cara alisca cuyapälär yanapäcugmi, jinaman razoncaglata rimagmi.

¹⁵Paypitam chay Bautizag Juanga gayacuypanuy rimara cay nir: “Guepäta aywamugga mas munayniyogmi cayan. Nätan payga mas unaypitam cayara nogapitaga” nir. ¹⁶Chaura alisca cuyapäcug pay captinmi, Juan ningannuysi cananga nä lapanchis chaynuyla chrasquiyanchi chay lapan yanapayninta. ¹⁷Chaypitaga Moisespis isquirbiram. Chaura chay yanapämagninchiga, jinaman razoncagta willamagninchiga casha Jesucristom. ¹⁸Manam pisi ricapurachu imaysi Diostaga. Chay Tayta Dioswan cayag japalan Dios-mayilanmi, paypitaga musyachimasha canchi.

**Bautizag Juan pi cangantas
reguechicungan**

(Mt 3.11-12; Mr 1.7-8; Lc 3.15-17)

¹⁹Chaura Diospa wayinchru mandagcunam Jerusalenpita cachrarärimunag Israel casta sacerdotícunatawan yanapagnin Leví casta runacunata Juanman “¿Gamchu cayanqui chay shuyacurcayangä Diospa acrashan?” nir tapug. ²⁰Chaura Juanga razoncagtam nirun caynuypa: “Manam. Imanaypatag Cristoga cashag”.

²¹Niptinga yapaymi tapurärin: “¿Chauraga cayanqui maygantag Diospa unay willacugnin Eliaschu?”

Nipäcuptin Juanga: “Manam paychu cá” nirun.

Chaynuypa niptinga yapaytan tapurärin: “¿Chaura cayanqui Diospa willacugnin chay shuyacurcayangächu?”

Nipäcuptin Bautizag Juanga “Manam” nira.

²²Chauraga “¿Mayganmar cayanqui? Rimacuy, cachramagnícunata willapäcunäpag. ¿Mayganmi cayä’ ninquitag?”

²³Nipäcuptinmi Juanga cay nin: “Noga cayä jäpag pampachru gayachracuypanuy rimamugmi ‘Camacurcay Munayniyog Diospa-mayin chrämunanpag’ ninganmi, Diospa unay willacugnin Isaiasga nogapitam chaynuy rimara” nin.

²⁴Nätan chay cacrashacunachru fariseo castacunaga ²⁵tapurärin cay nirmi: “Mana Cristo cayarga, mana Elías cayarga, nätan Diospa chay willacugninta ‘Shuyacurcayangä’ mana cayarga, chauraga ¿imanirtag bautizayanqui?”

²⁶Nipäcuptinmi Juanga nin: “Nogaga bautizayä yaculawanmi. Payga nä cay runacunachrümi cayan. Paytaga manam reguepäcunquiragchu. ²⁷Payga nä aywayämun guepätam. Payga mas munayniyogmi cayan nogapitaga. Paypagga sandaliata pasquipunalapagsi manacagnin runam cá” nirun.

²⁸Chaynuypa Juanga nira Jordán mayu wacläcag chimpan Betaniachru, runacunata bautizayarmi.

**Bautizag Juan salvacugta
reguechipäcamangan**

²⁹Chaura warantin Bautizag Juanga ricapurun Jesustam payman aywayämugta. Jinarcurmi cay nin: “Rircäripäcuy, paymi cayan juchacunapita wanug achrcashnuysi. Paytam Dios cachrarayämun lapan runacunapa juchanpita wanunanpag.

³⁰Nogaga paypitam nipäcurag: Guepätam aywayämun juc runa, nogapita mas munayniyog. ‘Payga unaylapitam nä cayara’ nir. ³¹Manam nogas musyararagchu salvacug pay cangantaga. Nätan nogaga runacunata bautizayarä Israel runacunata pay salvacug canganta reguechinäpagmi nipäcaman”.

³²Nircursi Juanga cay nirmi willaparäriman: “Noga ricapurämi Santu Espiritu jana pachapita juc palömanuy uranparcamur payman chragta. ³³Chaycamaga manam musyararagchu salvacug pay canganta, runacunata bautizänäpag cachramag Diosga, nämi cay nimasha cara: ‘Santu Espiritu uranparcamur pimansi chragta ricapungay runam, Santu Espirituwan yanapapächushunqui nogapa runäman muyuyta’ nir. ³⁴Chaura nogaga ñawianmi ricarä payta, nätan musyayä shumagmi pay Diospa-mayin canganta niräriman”.

**Quima olgocuna Jesupa
discípulunman muyupäcungan**

³⁵Chaura mas warantinchrüsi chaychru yapaytan carcayarä, nätan Andreswan, jinaman Bautizag Juanwan. Andreswan nogaga capäcurä Bautizag Juanpa discípulunmi. ³⁶Jinarcurmi Jesús chaypa puriyagta ricapurur Bautizag Juanga cay nipäcaman: “Rircaripäcuy. Wacmi cayan juchanchipita wanug achrcashnuysi wanunanpag Dios cachramungan”.

³⁷Niptinga Andreswan nogaga aywacurcä Jesupa guepantam. ³⁸Chaypitam guepan aywayagta ricaparärimarga muyurcamur cay nipäcaman: “¿Imatatag munarcayanqui?”

Niptinga “Yachrachig, ¿maychrümi yachrayanqui?” nipäcümü.

³⁹Chaura Jesusga “Shamuy ricag” nipäcaman. Jinarcurmi aywarga ricapäcamurä maychru yachragtas. Chay junagga quëdarärirä paywan, ishca y ürala chacananpag faltaptinmi.

⁴⁰Chay aywag-mayä Andresga cara Simonpa wauguenmi. ⁴¹Chaura Andresga pasaymi aywacun wauguen Simonman. Chaypitam Simontaga willapacusha cay nir: “‘Salvacugtam cachramushag’ Dios ningantam tarirärimü” nir.

⁴²Chauraga chrarachimun Jesuscagmanmi. Jinarcurmi ricapururga Jesús cay nirun: “Gamga cayanqui Jonaspä churin Simonmi. Nätan cananpitaga Cefasgam gayapäcushunqui” nirun. (‘Cefas’ ninanga ‘Pedro’ ninanmi.)

**Discípulunpag Felipetawan
Natanaelta Jesús gayangan**

⁴³Chaypitam mas warantin Jesusga “Galilea ninganpa aywashag” niyarmi, tincurun Felipewan. Chaypitam paytaga “Nogawan uryashun” nirun.

⁴⁴Felipega cara Betsaida marcapitam. Nätan chay marcapitam capäcura Andreswan Pedrosi. ⁴⁵Chaura Felipes aywacun Natanaelmantan. Chaypitam paytaga cay nisha: “Moisespa isquirbishanchru, jinaman Diospa willacugnincuna isquirbishanchru ningannuy runawanmi tincuräri. Payga canag Nazaret marcapita Josëpa churinmi”.

⁴⁶Niptin Natanaelga cay ninshi: “¿Nazaretpita yargamunmanchur chaynuy ali!”

Niptin Felipega “Shamuy ricag” nisha.

⁴⁷Chaura Natanael nä yaycayämuptinmi Jesusga cay nin: “Wacmi icha cayanga razoncag Israel castaga. Payga manam casqui rimayta yachranchu”.

⁴⁸Niptin Natanaelga “¿Imanaypatag regueyámanqui?” nin.

Chaura Jesusga “Manaragsi Felipe gayashuptilaymi noga reguerag, yürasapa higos monti chraquinchru mana ricacayla cayaptiqui” nin.

⁴⁹Niptin Natanaelga cay nin: “Tayta yachrachig, gamga cayanqui Diospa-mayinmi, jinaman cayanqui Israel runacuna shuyacurcayangä reymi”.

⁵⁰Niptin Jesusga “¿Higos monti chraquinchrümi reguerag niptilächu ‘Payga razonpa Diospa-mayinmi’ nir, yupachicayámanqui? Cay ningagpitaga mastam ima-aygatas ricanqui mas guepamanga”. ⁵¹Nircurmi cay nipácaman: “Mayapácamay shumag: Cananpita ricapácunqui noga jana pachapita shamusha runapita, angelnincuna jegapácugtam, jinaman nogaman uranpapácamugtam” nipácaman.

Diospa-mayin canganta Jesús reguechicungan

2 ¹Chaypitam nä quima junag cayaptin, juc runa casarara Canä nipácungä marcachru. Chay marcaga cara Galileachrümi. Chaychrümi cayara Jesuspa mamansi. ²Chaura Jesuswanmi discipuluncunas aywapácürä chay casarag gayachipácamaptin. ³Jinarcurmi vñu pishiruptinga, mamanga Jesusta cay nin: “Vñum nä mana canchu”.

⁴Niptin Jesusga “Mama, ¿imanirtag nogata niyámanqui? Manaran ürä chrämunragchu lapanwan reguechicunäpag”.

⁵Niruptin mamanga chay vñu chragachracugcunatam nirun: “Ima-aygatas rurapácunquim pay nipácushuptiquiga” nirun.

⁶Chauraga chaychru cayara sogta botijacunam rumipita. Chaycunata

Israel castácuna charapácug yacupagmi “Diospag ali canäpag” nir, chagchucurcänanpag. Chay botijacunata cara pachrac litrunuy yacu yaucugcamam.

⁷Chaypitam Jesusga chay chragachracugcunata “Yacuta wiñapácuy cay botijacunaman”.

Niptinga wiñarärin juntatacama.

⁸Chaura Jesusga cay ninmi: “Cananga jorgorcur, apapácuy cay fiestachru atendig runaman”.

Niptinga ningannuylam rurärärin.

⁹Jinarcurmi atendig runaga chay yacupita vñuman muyushataga malirun. Payga manam musyarachu maypita jorgapácamungantas. Musyaraga chragachracugcunalam yacu wiñapácunganta. Chaura chay atendig runaga, casarayag olgota gayarcurmi cay nin: ¹⁰“Pi maysi alinnin vñutam jorgamun naupataga. Nä alisca upyaräriptinran jorgamun jucläyacunataga. Nätan gamga alinnincagta chrurasha canqui mas guepapagtan” nin.

¹¹Chay Canä marcachrümi Jesús chayta rurara munayninwan. Chaynuypam wamagta reguechicura pi cangantas. Nätan discipuluncunaga paylaman mas yupachicuytam galacayarärirä.

Jesús Jerusalenchru pi cangantas reguechicungan

(Mt 21.12-13; Mr 11.15-18;
Lc 19.45-46)

¹²Chayta ruracurcur, Jesusga uranpara mamanwan, wauguencunawan, nätan nogacuna discipuluncunawan Capernaum marcatam. Chaychru capácürä ishca quima junaglam.

¹³Nä Pascua nipácungä fiestácuna nachrgayämuptinmi Jesús aywara

Jerusalén marcata nogacuna discipuluncunawan. ¹⁴Jinarcurmi Jesusga Diospa wayincag sawan ruyichru tarirun chay juc casta runacuna gotucarcänan cagchru chay golgue trucagcunata, mäsayogcama tayäcurcayagta, jinaman törucuna, uyshacuna, palömacuna ranticurcayag runacunata. ¹⁵Chaynuyta ricarur Jesusga, juc asticunata rurarcurmi chaywan gargaramun washaman lapanta, uyshantintawan töruntinta. Nätan golgue trucagcunapatam golguencunata wichircapur mäsanacunata ticpay usharun. ¹⁶Palöma ranticugcunatam nätan cay nin: “Jucla caycunata jorgapäcuy caypita. Ama Tayta Diospa wayinta muyuchipäcuychu ima-aygas ranticuna wayiman” nir.

¹⁷Chaynuy ruraruptin discipuluncunaga yarparäri isquirbishanchru cay ningantam: “Wayiqui gamlapag canan raygoga ima-aygatas rurashagmi” ningantam.

¹⁸Chaura Diospa wayinchru mandagcunaga alisca piñasham “¿Pi nishuptiquitag gargochracurrunqui? Nä cayta rurayarga, mä munayniquiwan ruray imalatas pi cangantas musyapäcunaypag” nirärin.

¹⁹Nipäcuptinga Jesús nira: “Juchruchipäcuy Diospa cay wayinta, nätan quima junagtaga sharcachishagmi”.

²⁰Niptin chay Israel casta mandacunaga nipäcura: “Chruscu chrunca sogtayog watatam cay wayiga sharcurayan. Gamga nätan ¿quima junagtam sharcarachiman ninquichu?” nir.

²¹Nätan Jesús Diospa wayinpita rimanganga cara quiquinpa cuerpunpita. ²²Chaymi wanushapita nä Jesús cawacaramuptinga

discipuluncunaga yarparäri chay cuerpunpita rimanganta. Chayran tantiapäcusha cä paypita isquirbishanuyla, nätan rimangannuyla ruracanganta.

Jesusga manam pi runamansi yupachicurachu

²³Chay Pascua fiesta wichan Jesús Jerusalenchru cayaptin, achcam runacuna ima-aygatas munayninwan ruragta ricapäcur “Cay runaga razonpa Diospita” nipäcura. ²⁴Nätan Jesusga manam yupachicurachu paycunaman, lapalanpa shongoncunata musyar. ²⁵Manam payga munan maygansi willanantaragchu runacunapita. Payga quiquinmi musyara runacunachru ima-aygacagtas.

Jesusman Nicodemo aywangan

3 ¹Chauraga cara fariseo nipäcungan casta runam. Payga cara Israel castäcunapita, alisca alinninpag ricasha runam aliscannin yachrag runam, Nicodemo jutiyog. ²Paymi Jesusman pagaspa chrarur cay nin: “Yachrachig, musyarcayämi yachrachinaypag cayman Dios cachramushungayta, manam pisi ima-aygatas ruranmanchu gam rurayangaynuyga. Caycunataga ruranman pisi Dios yanapptilanmi”.

³Niptin Jesusga nirun: “Mayamay shumag: Pisi mana yapay näcigga manam Dioswan cawangachu imaysi”.

⁴Niptin Nicodemoga nisha: “¿Imanaypatag runaga nä chacha cayar yapay näcimunga? Manam pisi mamanpa pachranman yaycunmanchu yapay näcimunanpag”.

⁵Niptin Jesusga cay nin: “Mayamay shumag: Mana yacupitawan Espiritupita näcigga, manam Diospa munayninman yacungachu imaysi. ⁶Pi maysi runapita näcimugga runalam. Nätan Espiritupita

näcimugga nä Diospa castanmi. ⁷Ama cay ningagpita mayacasha nirag caychu. Pi maysi näcipäcungaga yapayran. ⁸Tantiachishay caynuypa: Maypitas chaypitas walyamuptin, wagariglatam mayanchi. Nätan manam musyayanchichu maypita aywamungantas ni mayta aywayangantas. Chaynuymi mana ricapunchichu imanuyta runata chay Espíritu Diospa runanman muyuchingantas”.

⁹Niptin Nicodemoga cay ninmi: “¿Imanaypatag chaura chayga ruracan?”

¹⁰Niptin Jesusga nin: “Gamga cayanqui Israelchrüga aliscannin yachrachigtag. Nätan ¿manachu cay ningagta tantianqui? ¹¹Mayamay shumag: Nogacunaga rimapäcü musyapäcungätam, ñawicunawan ricapäcungätam, nätan gamcunaga manam chrasquicurcanquichu nipäcungagta. ¹²Chaura cay pachachru cagcunapita rimayaptisi, ‘Mana razonchri’ nircayarga manam gamcunaga razonchri nipäcunquichu jana pachachru cagcunapita rimapaptisi. ¹³Nätan manam pisi jegashachu jana pachaman, chaychru cagcunapita willapäcushunaypag, antis aywarayämü chaypitaga, noga jana pachapita shamusha runalam. ¹⁴Moiseschu unay wac jäpag pampachru culebra rurashata gueruman chrurayur shayachira, chaynuyran noga jana pachapita shamusha runasi gueruman chrurasha cashag. ¹⁵Chaynuypa pi maysi razonpa chrasquimagcuna, Dioswan imaycamas ali cawapäcunanpag”.

Lapan runatam Diosga cuyan

¹⁶Chaura Tayta Diosga alisca cuyacugla carmi, cuyasha cay

pachachru lapan runata. Chaymi cachramusha chay japalaylan Dios-mayinta lapan pi maysi “Payga razonpa Diospitam shamusha” nir, yupachicugcuna mana juchalanchru wanupäcunanpag, antis Dioswan imaycamas cawapäcunanpag. ¹⁷Diosga cay pachaman cachramusha Dios-mayinta manam “Cay runacuna juchanpita cunchuchun” ninanpagchu, antis lapan runata pay salvananpagmi. ¹⁸“Payga razonpa Diospitam” nir, pisi chrasquicugga, “Manam nä cunchunquichu” nisham cayan. Nätan pisi mana chrasquicugga cunchunanpag nä nisham cayan, Diospa chay japalan-mayinta, mana chrasquicunganpita. ¹⁹Imaycamas cunchunanpag nä nichicarärin juc achquinuysi Tayta Diospita shamushata mana chrasquicurcarmi. Antis juchäcuyälar cawacuytala munar ima-aygatas lutanlata cushisha rurapäcunganpitam. ²⁰Pi maysi lutanlata ruragga chregninmi chay achquinuysi shamushata. Nätan manam ni ashuyärimunpishchu paymanga chay lutan rurarcayanganta ninanpita. ²¹Nätan pi maysi Dios ningannuy cawagga ashuyapäcun chay achquinuysi shamushamanmi Diospa yanapayninwan ima rurarcayangantas musyapäcunanpag.

Bautizag Juan Diospa-mayin Jesuspita yapay rimangan

²²Chaypitam Jesusga aywara nogacuna discipuluncunawan Jordán mayucama Judea nipäcungächru. Chaychru capäcurä Jesuswan bautizarcayarmi. ²³Chaypinga Juansi bautizayara mas janapam, Salemman nachrgana Enón mayuchrümi chaychru yacu achca captin. Chaymanmi runacuna aywapäcug bautizächicug.

²⁴Chaypinga Juanta manaran carcelman jitayapäcusharagchu cara.

²⁵Chaura Juanpa ishca y quima discipuluncunash, juc Israel casta runawan galayapäcusha tapunacuyta yacuwan maylacular Diospag nä ali capäcunanpita. ²⁶Jinarcurmi paycunaga aywapäcusha Bautizag Juanman. Chrarärirga cay nipäcusha: “Yachrachig, cay Jordán mayupa waclacag chimpachru capäcungay runam. ‘Payga munayniyog’ ningaymi cananga bautizayänag. Jinarcurmi lapan runacuna aywarcayan payman”.

²⁷Nipäcuptinmi Juanga cay nin: “Pi maysi imatas rurayanga Dios munaptinmi. ²⁸Gamcunaga shumagmi musyarcayanqui cay ningäta: ‘Nogaga manam cä Cristochu, antis paypa naupanta chay aywamug willacuglanmi cay’ nipäcungagta. ²⁹Juc casamintuchruga chay casarag warmiga gowanpam. Nätan chay gowan rimaptinga lädunchru cayag fiadorninga aliscam cushicun. Chay fiadonuy carmi cananga nogasi cushirayä alisca paypita mayacur. ³⁰Cananga paytaran ricapäcunga mas alinninpag, nätan nogatam ricapäcamanga mas manacagpag”.

³¹Nircurga “Jana pachapita aywamugga mas munayniyogmi cay pachachru pi may runapitas. Caylapita aywamugga runalam, jinaman rimansi cay pachachru cagcunalapitam, nätan jana pachapita aywamugga cayan pi may runapitas mas munayniyogmi. ³²Payga riman ricangantam, mayangantam, nätan manam pisi chrasquicunchu rimapayaptinsi. ³³Nätan maygansi pay ninganta chrasquicugga riman, razonpa Dios rimangantam.

³⁴Chaura Dios cachramunganga riman Dios rimangantam, Santu Espiritu payta chaynuyla yanapptin. ³⁵Tayta Diosga

cuyanmi chay Dios-mayinta, nätan paypa munayninmanmi chrurasha lapan ima-aygatas. ³⁶Chay Dios-mayinta razonpa chrasquicugga nä galayurun Dioswan imaycamas cawaytam. Nätan chay Diospa-mayinta mana cäsucugga manam cangachu chay ali cawaychru, antis nämi Diosga piñarayan chay runapag” ninmi.

Samaria runacuna Jesusta chrasquicurgangan

4 ¹Jinarcurmi fariseocunaga musyarärira Juanpita, mas achcata Jesús bautizayanganta, jinaman mas achca runa gatararcayanganta. ²Manam Jesusga bautizarachu, antis nogacuna discipuluncunalam bautizapäcurä. ³Nätan Jesús chayta musyarurga nogacunawanmi yargora chay Judeachru cayanganpita Galileaman cutinanpag. ⁴Chay cutir, pasapäcunä cara Samaria marca ninganpam. ⁵Chaura aywarcayangächrumi chraräri Sicar ningan marcaman, churin Josëta Jacob gongan pampa tincugman. ⁶Chaychrümi cara Jacobpa yacu pözun rurasha. Chaura Jesús ushacasha aywayarga, pözu manyanmanmi tayurun. Chayüra nämi nachrgayara chraupi junagman.

⁷Chaura discipuluncunaga aywapäcurä micuy rantig Samaria marcatam. ⁸Chaycamam juc warmiga chrarunag yacu wishicug. Chaytam Jesusga “Yaculay mama” nisha.

⁹Niptin chay Samaria warmiga “¿Imanirtag Israel casta cayar, gamga yacuta manacayämanqui nogga Samaria warmita? Manatag Israel casta runawan Samaria runacunaga rimapanacunchichu”.

¹⁰Niptin Jesusga nisha: “Dios cuyapälär goshunayta tantiarga, nätan yacuta pi manacuyäshungaytas

musyarga, gam manacamaptiqui, noga gorugman cawachicug yacutam”.

¹¹Niptin warmiga ninag: “Tayta, manatag charanquichu imatas yacuta jorgamunaypag, natan yacuga cayan ruyichruragtag. Chauraga ¿maypitatag gamga gomanqui chay cawachicug yacutaga? ¹²¿Gamga cayanqui awillucuna Jacobpita mas munayniyogchu imatag? Paymi gopacamasha cay pözutaga, quiquinsi churincunas uywancunas upyacunanta”.

¹³Niptin Jesusga cay ninag: “Cay yaculata upyagtaga pitas maytas yapaymi yacunanga. ¹⁴Natan noga gongä cawachicug yacu upyagtaga, manam imaysi yacunangachu. Antis cawachicug yacuta noga gongäga runachru canga, juc pucyupita chaynuyla yacu yargayämugnuymi imaycamas cawag cananpag”.

¹⁵Niptin warmiga ninag: “Tayta, gomay chay yacuta mana imaysi yacunämānanpag, natan yacu jorgog mana cay pözuman imaysi aywamunāpag”.

¹⁶Niptin Jesusga “Ayway, gowayta gayamuy, jinarcur cutimuy”.

¹⁷Niptin warmiga cay nisha: “Manam canchu gowä”.

Chaura Jesusga ninag: “‘Manam gowä canchu’ nirga, alitam nirunqui.

¹⁸Gampaga goway cara pichgam, natan canan cayāchingaysi manam gowaychu. Chaynuy nirga razoncagtam niranmanqui”.

¹⁹Niptin warmiga ninag: “Tayta, gama cayanqui Diospa willacuginmi.

²⁰Awillucunaga Diosta alawapäcug cay gotuchrümi. Natan gamcuna castaga ‘Jerusalenchrümi Diosta alawachwan’ nipäcunquitan”.

²¹Niptin Jesusga cay ninag: “Mamala, razonchri ni cay rimayangäta: Nämi pasay ayparayämun mana cay

gotumansi u Jerusalemansi aywalar Tayta Diosta alawapäcunaypag.

²²Samariapitacagga mana reguepäcungaytam alawarcayanqui, natan nogacunaga musyarcayämi pita alawarcayangäta. Jinamanga salvacugsi aywayämun Israel casta runapitatan. ²³Nämi chay junag chraramun. Natan chay junagchrümi nä cayanqui Tayta Diosta razonpa alawagcuna, lapan shongonpa alawapäcunan junagchrümi. Natan Taytanchisi munayanga chaynuy alawapäcunantam. ²⁴Diosga Espiritum, natan payta alawagcunaga razonpa alawapäcunman lapan shongonpam”.

²⁵Niptin warmiga cay ninag: “Musyayämi ‘Salvacugtam cachramushag’ Dios ningan aywamunanpita. Chaypita nä chraramur lapalanta pay tantiachipäcamänanta”.

²⁶Niptin Jesusga nisha: “Paymi noga cayä, gamwan canan rimayag”.

²⁷Chay niyaptilanmi discipulunculunaga chrarärümü micuy rantig aywapäcungäpita. Jinarcurmi mayacasha nirag ricacaräri Samaria warmiwan rimaptinga. Natan manatan maygäsi “¿Imatag tapurayqui? u ¿imanirtag rimaray chay warmiwan?” nipäcurachüga.

²⁸Chaura warmiga wacuyninta dejarcurmi aywacun marcata.

Jinarcurmi chaychrüga cay nimusha:

²⁹“Shapäcamuy. Ricapäcamuy, lapan rurangäta nimag runata. ¡Paypishchri cayan ‘Salvacugtam cachramushag’ Dios ningangal!”

³⁰Niruptin runacunaga aywaytam galacayärimun Jesuscagman.

³¹Chaycama nogacunaga Jesustam nircayä: “Yachrachig, micucurcuynar”.

³²Nipäcuptiga “Nogapagga cayan jucmi micunä gamcuna mana musyapäcungaymi” nipäcaman.

³³Chauraga “¿Pilas aparapamura micuytachur?” nir tapunacurcayaptimi.

³⁴Jesuga cay nipácaman:
 “Cachramagní munanganta rurayaymi, nâtan nimangancunata rurayaymi cayan nogapagga juc micuynuy. ³⁵Gamcunaga tarpurcur ‘Chruscu quillataran chrámunga cosëcha wichan’ nircayanquim. Nâtan noga nipácug: Rircaripácuy shumag, nâ micuy pogoshanuymi cayan wac yurag jacusha aywayämugcuna Diospita mayacurcänanpag. ³⁶Pi mayasi cosëchachru mincayga chrasquinmi pägunta, nâtan palansi imaycamas cawag capácunanpagmi, chay tarpucugsi cosechagwan cushisha cananpag. ³⁷Chauraga alitam rimapácun cay nir: ‘Tarpugga jucmi, nâtan cosechagga juctan’ nir. ³⁸Gamcunata noga cachrayä cosechag, mana uryapácungaymanmi. Chauraga juc runacunam uryapácura. Jinatam gamcunaga chay uryacurcanganta cananga cosecharcayanqui” nipácaman.
³⁹Jinarcurmi manacagpag ricasha chay Samaria runacunaga Jesusman yupachicurcasha achca, chay warmi “Lapan rurangätam niraman” niruptilan.
⁴⁰Chaura Samaria runacuna nâ Jesuscagman chrarärimurga “Quëdashunnar tayta” nipácura yapay yapay.

Nipäcuptin Jesuga quëdara ishcaj junagmi chaychru. ⁴¹Jinarcurmi quiquin Jesús rimagta mayarärir runacunaga mas achca chrasquicarärin.
⁴²Chauraga chay warmtha cay nipácuram: “Cananga payman yupachicurcayä manam willapacamangalaypachu, antis quiquícuna nogacunas mayapácusha carmi. Nâtan musyarcayäsi shumagmi lapan runa salvacug pay canganta” nipácura.

Soldäducuna mandag Roma runa Jesusta chrasquicungan

⁴³Chaypita nâ ishcaj junag Samariachru carcurga Jesuga yargora, nogacuna discipuluncunawan Galileata aywapácunäpagmi. ⁴⁴Jesuga quiquinmi runacunata cay nira: “Diospa willacugnincuna, manam maygansi alipa chrasquisha canchu quiquinpa marcanchruga” nira.

⁴⁵Chay ningannuylam Galileaman chraräriptiga, Jesusta chrasquirärin alipa, Jerusalemchru Pascua fiestaman aywar ima rurangantas ricasha capácun.
⁴⁶Jinarcurmi cutiyarärí chay Galileachru, Canä ningan marcaman, yacuta vinuman muyuchinganman.

Chaura Capernaumchruga cara reycagchru soldäducuna mandagmi Roma runa. Paypa churinmi gueshyasha.

⁴⁷Jinarcurmi Judeapita Canä marcaman Jesús chrámusha canganta nâ mayarurga aywaramunag paywan tincug. Chaypitam Jesustaga “Aywaläshunnar wayita tayta, olgo churiläta cuticächinaypag. Nâmar pasay wanunayan” nin.

⁴⁸Chaura Jesuga cay ninmi: “Ima-aygatas munayniwan mana ruraptiga, gamcuna juc castacunas manam ‘Diospitachr payga aywarayämun’ nipäcunquichu”.

⁴⁹Niptin chay gueshyapacug runaga cay ninmi: “Tayta, aywaläshunnar pasay-pacha, manaragsi churilä wanungancama”.

⁵⁰Niptin Jesuga cay ninmi: “Cuticuy wayiquita. Churiquiga cawangam”.

Niptin runaga Jesús ningalanman yupachicularmi, aywacun. ⁵¹Nâ Capernaum marcaman jegarpuyaptinshi, rantisha runancunaga yargarärimun taripacug: “Churiquiga nâ alim cayan” nir. ⁵²Chauraga tapurunshi: “¿Ima üranuypitam galayurun cuticayta?”

Niptinga “Ganyan chraupi junag pasaruptilanmi acachaynin amaynarun” nipäcunshi.

⁵³Chaura chay runaga tantiarun chayüranuy “Cawangam churiquiga” Jesús ningantash. Chaura runaga lapan aylluntin Jesusman yupachicuytam galayapäcusha. ⁵⁴Caywanga nä ishca cutim Jesusga reguechicura pi cangantas Judeapita Galileata aywar.

Jesusta wanuchiy munapäcungan

5 ¹Nä chaycunata ruracurcurmi, Jesusga nogacuna discipuluncunawan jegara Jerusalén marcata, Israel castacunapa fiestäcuna captin. ²Chay marcachrümi cara ‘Üyshacuna rantina puncu’ nipäcunganman nachrganachru juc gochrannuy si jatun pucyu pichga ramädayog. Chay jatun pucyutam hebreo rimaychrüga Betesda nipäcug. ³Chaypa puncuncunachrümi chränin gueshyagcuna capäcug, ñaushacuna, raticuna, gueshyagtucushacuna. ⁴[Chay gochranyamanga juc angelmi jana pachapita aywächramug. Jinarcurmi yacuta cuyuchig. Nätan chayman naupata jegarpugmi nä yacu cuyuyta usharuptinga cuticag ima-ayga gueshyapitas.] ⁵Chaychrümi canag juc runa nä quima chrunca puwagniyog wata gueshyagtucusha. ⁶Pay chrachrarayagta Jesús ricapururga, pasaymi tantiarun alisca unay nä gueshyayanganta. Chauraga tapurun gueshyagtam: “¿Cuticasha cayta munayanquichu?”

⁷Niptinmi gueshyagga nin: “Tayta, manam pisi canchu yacu cuyurimungan üra cay gochranyaman jitayamag. Nätan imaysi, aywayta nacayaptilämi naupäta juc jegarpuyan”.

⁸Niptin Jesusga nirun: “Sharcury. Cämayta apacurcur aywacuy”.

⁹Niptin runaga chayüram cuticarun. Jinarcurmi cämanta apacurcur aywacun.

Chay junag cara jamana junagmi. ¹⁰Jinarcurmi Israel castapa mandagnincunaga nirärinag chay cuticasha runata “¿Imanarayanquim! Cananga jamana junagmi. ¿Manam cämayta apanay junagchu!”

¹¹Nipäcuptin payga “Cuticächimagmi nogataga ‘Cämayta apacurcur aywacuy’ nimasha”.

¹²Niptinga tapupäcunag: “¿Pimi ‘Cämayta apacurcur aywacuy’ nirushunqui?”

¹³Nipäcuptin nätan runaga mana musyashachu pi cuticächingantas. Chay achca runapita Jesús nä aywasha captin.

¹⁴Chaypitam Jesusga chay cuticächingan runata tarirun Diospa wayinchru, jinarcurmi cay nin: “Canan nä cuticarayarga, ama masta jucächucuychu, mana imas mas juyunnin pasashunaypag”.

¹⁵Niptin runaga aywarunag chay Israel castacunapa mandagnincunamanmi “Jesusmi casha chay cutichimagga” nir willapäcug.

Jesús “Diospa-mayinmi cayä” ningan

¹⁶Chaypinpitam Israel casta mandagcunaga Jesusta ñawilanchru cachipäcura. Jinaman wanuchiylata munapäcura, jamana junagchru chay imacunatas ruraptin. ¹⁷Chaura Jesusga rimapayta galacuyun cay nirmi: “Dios-mayíga chaynuylam ruranancunata rurayan canancamas, nätan nogas paynuymi rurayä”.

¹⁸Chay niruptin chay mandagcunaga masran munapäcuras wanuchiya, manam jamana junagchru uryangalanpitachu, antis “Tayta Diospa-mayinmi cä” ninganpitawanmi.

¹⁹Chaura Jesusga cay nirunmi: “Mayapăcamay shumag: Noga Diospa-mayinga manam pasay imatas rurăchu quiquilăpitaga, antis Dios-mayï rurayangantam nogas rurayăga. ²⁰Tayta Diosga cuyamarmi noga Dios-mayinta lapan rurayanganta musyachiman, nătan mas aliscacunataran musyachimangas mayacasha nirag capăcunaypag. ²¹Tayta Diosga wanushacunata cawacăchimunmi. Chaynuymi noga, Diospa-mayinsi munangătaga cawacăchimü. ²²Tayta Diosga manam pitasi juchanta taripangachu, antis noga Diospa-mayintam chruramasha juchacunata taripănăpag. ²³Chaynuypa lapan runa, noga Diospa-mayintas Tayta Diostanuy alipa ricapăcamănanpag. Pisi nogata mana alipa ricamagga, cachramagnï Tayta Diostam mana alipa ricanchu. ²⁴Mayapăcamay shumag: Pisi, noga ningăta mayacamagga, jinaman cachramagnïman yupachicugga, nă galayurun imaycamas paywan cawaytam. Chauraga manam ‘Juchanpita imaycamas cunchuchisha cachun’ nishagchu. Nătan chaynuy mana nishagchu wanushanuysi cayanganpita imaycamas cawagman nă muyuruptinmi.

²⁵Mayapăcamay shumag: Nămi chayman nachrgararcayanqui. Nătan cananmi chay junag nă chraramun wanushacunanuysi cayagcuna, noga Diospa-mayin rimangăta mayapăcunan junagchru, jinaman căsucamagcuna Dioswan cawapăcunan junagchru. ²⁶Tayta Diosga quiquinmi munayninwan cawachin pitas maytas. Chaynuymi noga Diospa-mayintas nimasha paynuysi runa cawachig canăpag. ²⁷Nătan nimashatan runacunapa juchanta taripănăpagsi noga jana pachapita shamusha

runataga. ²⁸¿Imanirtag mana căsucarcămanquichu? Chrămungam lapan wanushacuna shimăta mayapăcunan junag. ²⁹Chaychrümi ali ruragcuna cawapăcamunga Dioswan imaycamas cawapăcunanpag, nătan lutan ruragcunas cawapăcamunga imaycamas cunchuchisha capăcunanpag.

³⁰Nogaga manam imatas pasay rurăchu quiquilăpitaga. Nogaga juchacunata taripayă Tayta Dios nimaptinmi, nătan nishagsi razoncagtam. Nogaga manam rură munangătachu, antis cachramagnï munangantam. ³¹Noga quiquilăpita rimaptüga, manam vălinchu imapagsi. ³²Nătan noga pi cangătas razoncagta musyachishugniquicuna cayanmi. ³³Gamcuna cachrapăcuraymi Bautizag Juanman tapug. Payga nipăcushuray razoncagtam. ³⁴Manam nogaga pisi reguechimănantaragchu mună. Rimarcuyăga Juanpitas, gamcuna salvacurcănaypagmi. ³⁵Juanga cara juc achqui rupayagnuymi. Gamcunaga payta mayacur nă cushicugpagmi carcayaray ishcai quima junaglaga. ³⁶Nătan, noga pi cangătas, Juanpitas mas shumag musyachicug cayanmi. Chaura Tayta Dios nimangannuy rurayangăcunam, pay cachramanganta musyarcayăchishunqui. ³⁷Jinamanga cachramagnï Tayta Diossi nogapitaga musyachipăcushuraymi. Nătan gamcunaga manam imaysi paypataga shimintas mayapăcuraypishchu ni paytaga ricapăpăcuraypishchu. ³⁸Nătan rimangansi manatan shongoycunaman yaucunchu, Tayta Dios cachramunganta mana chrasquicurcaptiquim. ³⁹Gamcunaga Dios isquirbichingancunata aliscam yachracurcayanqui, ‘Dioswan imaycamas cawananchipag’ nir, nătan chay isquirbishacunaga nogapitam musyarcayăchishunqui. ⁴⁰Chaynuy niyaptinsi gamcunaga, manam ni

munapäcunquichu nogaman aywamuytaga Dioswan imaycamas cawapäcunaypag.

⁴¹Nogaga manam munächu runacunapita alawasha cayta. ⁴²Nätan musyayätan Diosta mana cuyapäcungaytas. ⁴³Nogaga aywamura Tayta Dios cachramaptinmi, jinatam mana chrasquipäcamanquichu, nätan quiquilanpita pisi aywamugtam ichaga chrasquicarärinquimanga. ⁴⁴Gamcunaga jucniquis jucniquis alawasha caylatam munarcayanqui, nätan manam japalaylan Diospita alawasha caytaga munapäcunquichu. Chaynuy jinayarga manam imaysi nogaman yupachicarcämanquichu.

⁴⁵Ama nipäcuychu nogapag ‘Paymi juchachämäshun Tayta Diospa naupanchru’ nirga.

Juchachapäcushunquiga Moisespa isquirbishancunaman, chay yupachicurcayangaymi. ⁴⁶Razonpa Moisés ninganta chrasquicurcarga, nogatas chrasquipäcamanquimanmi. Payga isquirbira nogapitam. ⁴⁷Nätan pay isquirbingancunatas ‘Manam cayga Diospitachu’ nircayarga, ¿imanaypatag ‘Diospitam payga razonpa rimayan’ nipäcamanqui?’

Pichga waranga runata Jesús micachingan

(Mt 14.13-21; Mr 6.30-44; Lc 9.10-17)

6 ¹Chayta nircurga Jesús aywacura nogacuna, discipuluncunawan Galilea gochrapa wacläcag chimpanam. Chay quiquin gochralatam Tiberias gochra nipäcugsi. ²Achcam runacuna Jestusa gatirapäcura, gueshyagcunata munayninwan cuticächigta ricapäcur. ³Chaura Jesusga jegara juc gotumanmi nogacuna discipuluncunawan. Jinarcurmi chaychru tayarayarä. ⁴Nämi pasay nachrgayämura Pascua nipäcunagä, Israel castacunapa fiestäcuna.

⁵Jinarcurmi Jesusga achca runa aywamushata rircärirga Felipeta cay nin: “¿Maychrüttag cananga rantishun tantata cay lapan runacunapagga?” ⁶Chaynuy nira: “Mä ¡imaninagshi Felipe!” nirmi. Jesusga musyara shumagmi ima ruraytas.

⁷Chaura Felipega cay ninmi: “Ishcay pachrac junagchru juc runa gänangansi manam aypanmanchu, cay lapan runacunapagga uchuc uchuclata micayärinanpagsi”.

⁸Niptinga Simón Pedropa wauguen Andresga cay ninmi: ⁹“Juc walash caychru charayanmi cebädapita rurasha pichga tantata, ishca acapa pescäduwan. Nätan ¿imatag chaylaga caychica runapagga?”

¹⁰Niptin Jesusga cay nipäcamanmi: “Tayucurcay nipäcuy runacunata”. Chaura niräriptiga, alisca guewamanmi tayarärin pichga waranganuy olgocuna. ¹¹Chaura Jesusga chay tantacunata charicur nä Tayta Diosta “Gracias” nircurga discipuluncunatam goräriman. Jinatam nogacunaga aypupäcurä lapan tayaracayagta. Chaynuy lapan rurara pescäduwansi. Chaytas aypupäcurä lapantam imanuytas munapäcunganpita. ¹²Chaura nä yamangancama micaräriptinga, discipuluncunatam Jesusga nipäcaman: “Shuntapäcamuy wac acapa puchushacunata mana pasay usunanpag”.

¹³Nipäcamaptinga palarärirä chrunca ishcayniyog balay juntatam, chay pichga tantapa puchunta. ¹⁴Chaura runacunaga munayninwan chay ruragta ricarärirga “Cayga cayan razonpa Diospa chay willacuginmi ‘Cay pachaman cachramushagmi’ Dios nimanganchim” nipäcura.

¹⁵Nätan paytaga “¿Imanaypas aywachishun reyninchi cananpagmi!” nipäcugta tantiarur Jesusga yargorcurmi aywacun mas janaman chaychru japalan cananpag.

Runacuna Jesusta ashipäcungan*(Mt 14.22-27; Mr 6.45-52)*

¹⁶Chaura pacha nä chacanayaptinga, discipuluncuna uranpapäcura gochracagmanmi. ¹⁷Chaypitam nä chrarpurgaya yayaräri büquiman nä chacasha. Jinarcurmi Capernaumman pasayta galayurcayarä, nätan Jesusga manaran chrämuraragchu. ¹⁸Chaura galacayun alisca walyaytam. Jinarcurmi yacu lagyayta galacayamun. ¹⁹Chaypitam nä juc liwa masta aywarayarga ricaparäri Jesusta nä büquicagman yacu janampa ichriyämugta. Jinarcurmi nogacunaga manchacaräri. ²⁰Chaura payga “Nogam cayä. Ama manchapäcuychu” nirärimanmi. ²¹Chauraga cushisham yayarärichi büquiman. Jinarcurmi chraräri ashcamayla chay Capernaummanga.

²²Warantinga chay gochrapa waclacag chimpanchru quëdamusha runacunaga tantiaräringa chay juclay puchurayag büquilawan shapäcamungantam. ²³Chauraga Tiberias marcapita juc büquicunash chraräringa Jesús “Gracias” nicuruptin tantata micapäcungan cercanman. ²⁴Chaura runacunaga paycunachru mana Jesussi ni discipuluncunas capäcungäta tantiaräringa chay büquicuna chragman yaycurcurmi aywarcämung Capernaumman Jesusta ashircayar.

**Micuynuycanganpita
Jesús rimangan**

²⁵Chaura warantinga nä caylä chimpanchru chrarärimurga tincuräringa Jesuswanmi. Chaypitam tapuräringa cay nir: “Yachrachig, ¿imaytag chraramuray cayman?”

²⁶Nipäcuptinmi Jesusga cay nin: “Razoncagtam nircayag: Gamcunaga

ashircayämanqui yamapäcungaycama micarärimmi. Nätan manam munayniwan imanir rurangäta tantiapäcusha carchu. ²⁷Ama uryapäcuychu caylachru ushacag micuylapagga, antis uryapacuyga imaycamas cawachicug mana ushacag micuycagpag. Chaytaga gopäcushay noga jana pachapita shamusha runam. Chaypagmi nogata Dios cachrayäman”.

²⁸Niptinga tapuräringa: “¿Imatag rurapäcuman, Tayta Dios munanganta rurapäcunäpag?” nir.

²⁹Chaura Jesusga cay ninmi: “Tayta Diosga munayan noga, cachramushanta chrasquicarcämänaytam”.

³⁰Niptin chauraga nipäcura: “¿Rircarayapti mas alinninta imatas rurarunquimancho munayniquiwan chrasquicurcänagpag? ¿Imatag ruranchu? ³¹Unay awillunchicuna wac jäpag pampachru micapäcura ‘manä’ ningantam isquirbishachru ningannuyshi:

Chaura Moisesmi micapäcunanpag chay micuyta gora jana pachapita”.

³²Nipäcuptin Jesús nira: “Mayapäcamay shumag: Manam Moiseschu gora chay jana pachapita micuytaga, antis Tayta Diosmi jana pachapita razoncag micuytaga gorcayäshunqui. ³³Tayta Dios gopäcushungay micuyga cayan jana pachapita aywamusham. Chayga lapan runatam cawachin”.

³⁴Niptinga cay niräringa: “Tayta, chaynuylar gopäcamay chay micuyta”.

³⁵Nipäcuptinmi Jesusga cay nin: “Nogam cayä chay cawachicug micuyga. Nogaman aywamugcagga pisi chrasquimagcagga canga yamangancama micushanuymi imaycamas. Nätan pisi chrasquimagcagga canga yamangancama yacu upyashanuymi

imaycamas. ³⁶Nätan ningagnuysi gamcunaga nä manam ‘Diospitachr’ nipäcamanquichu ima rurayagta ricarcayämarsi. ³⁷Pi maysi Tayta Dios gomanganga nogamanmi aywamun. Nätan nogaman aywamugcagtaga manam gargoshagchu washaman. ³⁸Nogaga jana pachapita aywamurä manam shongö munanganta ruragchu, antis cachramagní munanganta ruragmi. ³⁹Nätan cachramagní Tayta Diosga munan chay lapan runa gomanganta mana maygalantas ogranätam, jinamanga ushanan junagchru cawacächimunätam. ⁴⁰Chay cachramagníga munan pi maysi noga Diospa-mayin cayangäta tantiarur chrasquicarcämänatam, imaycamas ali cawapäcunanpag. Nätan nogam ushanan junagchrüga cawacächimushag”.

⁴¹Chaynuypa niruptinga Israel castäcunapa mandagnincuna pengapaytam galacayärin “Nogam cayä jana pachapita aywamusha micuy” ninganpitaga. ⁴²Chauraga cay ninacurcaram: “Cay Jesusga Josëpa churintar. Caypataga mamantas taytantas regueyanchitag. Nätan jimanirtag ‘Jana pachapitam aywarayämü’ niyanga?”

⁴³Nircayaptinmi Jesusga nirun: “Ama nä lutanta rimapäcuychu. ⁴⁴Manam pisi aywamuyta atipanmanchu nogaman, cachramagní Tayta Dios mana pushamuptinga. Nätan nogaman pushamungancunata ushanan junagchru cawacächimushagmi. ⁴⁵Diospa unay willacugnincuna isquirbipäcunganchru ‘Diosmi yachrachinga lapan runata’ niyanmi. Chauraga lapan runas chay Tayta Diospita mayacugga, jinaman yachracugga aywamun nogamanmi. ⁴⁶Manam pisi ricapurachu Tayta Diosta. Ricapuräga Diospita noga

aywamushalam. ⁴⁷Mayacurcay shumag: Pisi nogata chrasquicamagga, nä galayurun Dioswan imaycamas cawaytam. ⁴⁸Nogam cayä chay imaycamas cawachicug micuyga. ⁴⁹Unay awillunchicuna chay jäpag pampachru ‘manä’, micucuna lapanmi wanupäcusha. ⁵⁰Nätan nogaga rimaparcayag jana pachapita aywamug micuypitam. Chayta pisi micugga manam nä wanungachu. ⁵¹Nogam cayä chay jana pachapita aywamusha micuyga. Cay micuyta micugga Dioswanmi imaycamas cawanga. Nätan chay micuy gopäcunagga cayan cuerpümi. Cay cuerpütam goshag cay pachachru lapan runacuna raygo”.

⁵²Chaura Jesús niruptin, Israel castäcunapa mandagcunaga galacayärin quiquincamam cay ninacuyta: “¿Imanaypatag cay runaga gomäshun cuerpunta micunanchipagga?”

⁵³Nipäcuptin Jesusga nin: “Mayapäcamay shumag: Noga jana pachapita aywamushapa cuerpüta mana micapäcurga, nätan mana yawarnita upyapäcurga wanushanuymi carcayanqui. ⁵⁴Pisi cuerpüta micugga jinaman yawarnita upyagga nä cawayan imaycamas Dioswanmi. Paycunatam noga cawacächimushag ushanan junagchru. ⁵⁵Nogapa cuerpüga razoncag micuymi, nätan yawarnisi razoncag upyaymi. ⁵⁶Pi maysi cuerpüta micugga nätan yawarnita upyagga nogawanmi cayan, nätan nogas paywantan cayä. ⁵⁷Chay cachramagní Tayta Diosga imaycamas cawacugmi. Paynuymi nogas cayä, nätan pisi cuerpüta micugga noganuymi cawanga imaycamas. ⁵⁸Nogam cayä jana pachapita aywamusha micuyga. Cay micuyga manam unay awillunchicuna ‘manä’ ninganta micapäcungannuychu. Paycuna chayta micurayarsi

wanupäcusha lapanmi. Nätan pisi cay micuynuysi cayagman yupachicugga cawanga Dioswanmi imaycamas”.
⁵⁹Caycunatam Jesús yachrachira Israel castäcuna gotucapäcunä wayichru.

**Micuypita rimanganta Jesús
tantiachingan**

⁶⁰Chay yachrachinganta mayaräringa achcam Jesusta gatrircunacuna cay nipäcura: “Cay nimanganchicunataga manam chrasquichwanchu. Nätan shaualaga manam pisi chrasquinmanpishchu”.

⁶¹Nipäcugta tantiarur Jesusga cay ninmi: “¿Piñäcarärichigchu chay rimangäwan? ⁶²Chauraga ¿imanuyrag piñäcarärinquiman, noga jana pachapita shamusha runata unay cangäman jegagta ricaparärirmaga? ⁶³Espiritum runataga cawachin. Cuerpuga manam quiquilanga cawanchu. Nätan niyangäta chrasquicugga pisi razonpam cawanga imaycamas. ⁶⁴Nätan gamcunachru waquinniqui carcayanquiran mana chrasquicamagcuna” ninmi.

Jesuga galayunanpita-pacham musyara picuna mana chrasquipäcunantas, wanuchipäcunanpag pi reguechinantas. ⁶⁵Chaura Jesusga yapaytan cay nin: “Chaymi nipäcurag manam pisi aywamunmanchu nogaman, Tayta Dios mana pushapäcamushuptiquiga” nin.

⁶⁶Niruptin, Jesusta gatrircunacuna achcam aywacurcasha, manam nä puripäcurapishchu paywanga.

⁶⁷Chauraga chay chrunca ishcayniyog discipuluncunatam tapuräriman: “¿Gamcunas aywacuytachu munarcayanqui?”

⁶⁸Nipäcamaptinmi Pedro nipäcungä Simonga cay nin: “Munayniyog, ¿pimantag aywapäcushag? Gamga rimaparacayämanqui imaycamas

Dioswan cawaypitam. ⁶⁹Nogacunaga nämi chrasquicurcasha capäcug. Nätan musyarcayämi Diospita gam shamusha cangaytas”.

⁷⁰Niptin Jesusga nipäcaman: “Nogam acrapäcurag gamcuna, chrunca ishcayniyogta, nätan gamcunapita jucga cayan Asyagpam”. ⁷¹Chaynuypa Jesús rimara Simonpa churin Judas Iscariotepitam. Paymi casha chay chrunca ishcayniyogpita Jesusta wanuchipäcunanpag reguechig.

**Wauguencuna Jesusga manam
Diospitachu nipäcungan**

7 ¹Chaynuypa nircurga, Jesús purira Galilea nipäcungäpam. Judeamanga mana aywayta munarachu, Israel castachru mandagcuna wanuchiya munapäcuptinmi.

²Chaura nämi nachrgarayämura Israel castacunapa fiestäcuna, chay tolduchru yachrapäcunä junagcuna. ³Chaypitam wauguencunaga manacagpag ricar Jesusta cay nirärin: “Yargonquimanmi caypitaga. Aywanquimanmi Judeatas. Chaychrüsi discipuluycuna rurangayta ricapäcunanpag. ⁴Pisi reguechicuy munagga manam ruran imatas pacayninchrüchu. Nä caycunata rurayarga ruray lapan runa ricarcayäshuptiqui”.

⁵Jesustaga manam ni wauguencunalas “Cayga Diospitachr razonpa” nipäcurachu.

⁶Chaura Jesusga cay ninmi: “Manaran chay ruranä wichan aypamunragchu. Nätan gamcunapagga imayüras alilam. ⁷Juchasapa runacuna manam gamcunataga chregnipäcushunquimancho, nätan nogataga chregnipäcaman lutan ruraynincunata musyachiptimi. ⁸Gamcuna aywapäcuy fiestaman. Nogapagga manam üra aypamunragchu aywanäpag”. ⁹Nirga quädacuyun Galileachrümi.

¹⁰Chaypita nä wauguencuna aywaräriptinga, Jesuspis jegara chay fiestaman nogacuna

discípuluncunawanmi. Aywapäcurä pacaylapa yupaymi runacunapita.

¹¹Nätan Israel castacunapa mandagnicunaga Jesusta ashipäcunag wanuchipäcunanpag “¿Maychrürag cayan chay runa?” nir.

¹²Jinarcurmi runacunaga wishwishyaylapa rimayta galacayärin Jesuspita: Waquinga “Ali runam” nir.

Nätan waquinga “Casquipayan runacunatam, lutan runam” nir. ¹³Nätan manam pisi rimarachu achca runachruga chay mandagnicunata manchacur.

Chay fiestachru Jesús yachrachingan

¹⁴Nä chay fiesta lamitá cayaptinmi, Jesusga yaycurun Diospa wayin puncuman. Jinarcurmi galacuyun yachrachiyta. ¹⁵Chaura Israel castapa mandagnicunaga mayacasha niragmi capäcura cay nir: “Cayga ¿imanaypatag musyan ima-aygatas mana yachracusha cayarga?”

¹⁶Nipäcuptin Jesusga nin: “Cay yachrayächingäga manam nogapachu, antis chay cachramagnipam. ¹⁷Dios munanganta pisi ruray munagga tantiangam yachrayächingä Diospita cangantas u quiquiipa yarpaylapita rimayangätas. ¹⁸Pisi quiquinpa yarpaylapita rimagga runacunapita alinninpag ricasha cananpagmi riman. Nätan cachramugnin alawasha cananta munagga pisi riman razoncagtam, manam payga casqui rimagchu. ¹⁹Gamcunapagmi Dios rimanganta Moisés isquirbira, nätan manam maygalaysi cäsucurcanquichu. ¿Imanirtag wanuchiyta munarcayämanqui?”

²⁰Niptin runacunaga “Lutan espiritum gamchruga cayan. ¿Pitag wanuchiylata munayäshunqui?”

²¹Nipäcuptinmi Jesús cay nin: “Jamana junagchru juclaylata rurarungäpitam gamcunaga lapaysi nä mana alichu capäcunqui. ²²Gamcunata Moisés nipäcushuray lapan olgota señalapäcunaypagmi, nätan manam Moiseschu galayachira chay rurachiytaga. Antis mas unaycag awillunchicunam. Chaymi gamcunas señalarcayanqui jamana junag cayaptinsi. ²³Chauraga Moisés isquirbingancuna cäsusha cananpag, jina jamana junagchrüsi señalarcayarga amam piñäcurcanquimancho nogas runata shumag cuticarayächiptüga. ²⁴Gamcuna ama nipäcamaychu lutanta Moisés isquirbinganta mana shumag tantialarga, antis jamana junag imapag cangantas shumag tantiapäcuy” nira.

“Caychur cayan salvacugta shuyayanchiga” nipäcungan

²⁵Jesús niruptingta chay Jerusalemchru juc ishca runacunam cay ninacaräin: “Cay runaga chay wanuchipäcunanpag ashircayangannuytag cayan. ²⁶Cayga caychru lapan runa ricaytag yachrayächin, nätan manatag pisi imatas ninchu. ¡Marca mandagcunachur icha musyaräin! ¿‘Salvacugtam cachramushag’ Dios nimanganchi pay canganta? ²⁷Noganchiga musyayanchim wac runa maypita cangantas, nätan ‘Salvacugtam cachramushag’ Dios nimanganchi aywamunanpitaga manam musyanchichu maypita shamunantas”.

²⁸Chay nipäcugta mayarur Jesusga Diospa wayin puncuchru yachrayächir gayacuypañuyami cay nin: “Chauraga reguercayämanquichrar, jinaman musyarcayanquichr maypita aywamungätas. Nätan nogaga manam aywamurä quiquilapitachu, antis aywarayämü cachramagnü razonpa captinmi. Paytaga manam

reguepăcunquichu gamcunaga.

²⁹Nogaga nătan regueyămi, paypita aywamusha car. Paymi cachrarayăman nogataga”.

³⁰Chaura niruptinga pasay chariruytam munapăcura, nătan maygansi mana charipăcurachŭga, wanuchipăcunanpag manarag ũran aypamuptinmi. ³¹Chaypitam achca runacuna Jesusta chrasquicarărin, jinaman cay nipăcura: “Salvacug aywamursi manam cay runapita mastaga munayninwan runanmanchu ima-aygatas”.

³²Chay runacuna Jesuspita rimagta mayarurmi, fariseocunawan sacerdotăicunapa mandagnincunaga cachrarărimunag, Diospa wayin ricag guardiacunata Jesusta charipăcunanpag.

³³Chaura Jesusga cay ninmi: “Gamcunawan cashag manam ală unaychu. Nămi cuticushag cachramagnăman. ³⁴Gamcuna ashipăcamanquim, nătan manam taripăcamanquichu. Noga cayangămanga manam chrapăcamunquichu”.

³⁵Niruptin Israel castacunapa mandagnăcunaga quiquincamam cay ninacurcara: “¿Maytash cay aywacunga mana tarinanchitaga? ¿Aywacunga Diosta mana regueg runacunachru yachrachimugchur? ³⁶¿Imaninantatag niramanchi: ‘Ashipăcamanquim, nătan manam taripăcamanquichu. Nătan cayangămansı manam chrapăcamunquichu’ nirga?” nipăcura.

“Yacuta jirpuyaptin nogam că yacunuy” Jesús ningan

³⁷Chaura ushanan junagchrŭga chay fiesta cara mas jatunmi waquin junagcunapitaga. Chay junagmi shayuyur Jesusga gayacuypanuy cay nin: “Pisi juc yacunashanuy cayagga

aywamuy nogaman. ³⁸Isquirbishachru ningannuysi nogata chay chrasquicamagchrŭga juc mayu aywayagnuymi canga chay cawachicug yacu”. ³⁹Chaynuypa nira Jesusta chrasquicugcuna Santu Espirituta chrasquipăcunanpitam. Chaypagga manaran Santu Espiritu aywasharagchu cara Jesús jana pachaman mana cutisharag captin.

⁴⁰Chaynuypa nigta mayarăirga chay runacunachru ishca y quima rimapăcura: “Cay runaga razonpa Diospa willacuginmi” nirmi.

⁴¹Nătan waquinmi “Cristom” nipăcura. Chaypita waquincagmi nipăcura: “¿Galileapitachu salvacug aywamunan cayan?”

⁴²Isquirbishachrŭga niyan Rey David castapita nătan Belén marcapita aywamunantam. ⁴³Chaura Jesuspa jananmi runacuna acagyachinacarărin. ⁴⁴Nătan juc ishca y chaychru cayagcunaga chariruytam munapăcura wanuchipăcunanpag, nătan manam juclaylas charirachŭga.

⁴⁵Chay guardiacuna aywag jinala chrarăriptinga fariseocunawan sacerdotăicunapa mandagnincunaga cay nipăcusha: “¿Maytag chay runaga? ¿Imanirtag mana charipăcamunquichu?”

⁴⁶Nipăcuptin guardiacunaga nipăcunag: “Manam cay runanuyga pisi rimarachu imaysi”.

⁴⁷Nipăcuptin fariseocunaga nirărin: “Chaura gamcunas ‘Razonni nirchri’, chrasquicarărinqui. ⁴⁸Manam paytaga maygan mandagninchi chrurashacunas ni fariseocunas chrasquipăcunchu.

⁴⁹Nătan Moisés isquirbinganta, mana imatas tantiag gotaracunaga cayan ‘Lutan’ nisham Diospitas”.

⁵⁰Nipăcuptin paycuna casta Nicodemoga Jesusman chay pagaspa

aywagga cay nisha: ⁵¹“¿Moisés isquirbingan nimanchi ‘Mana juchan rimacuglata pitas juchanpita cunchuchun’ ninanchipagchu?”

⁵²Niptinga paytas cay nipäcusha: “¿Gamsi cayanqui Galileapitachu? Isquirbishacuna tantiyta yachracuy. Chaychru tarinqui Diospa willacugnincuna mana imaysi Galileapita yargamungantam”.

Lutan warmita Jesusman pushapácungan

⁵³Ninacurcuga wayincunatacamam aywacurcara lapansi.

8 ¹[Nätan Jesusga aywasha Olivos ningan gotutam. ²Chaypitam warantinga goyashla Diospa wayinman cutiyaramun. Chaura runacunaga lapanmi Jesusman ashuyarärin. Jinarcurmi payga imaysi tayuyur yachrachingannuy yachrachiya galacuyun. ³Chauraga Moisés isquirbinganta yachrachigcunawan fariseocunaga chrarärichimun juc gowayog warmitam juc olgowan punuyagta tarirärir. Jinarcurmi chraupiman shayayachir cay nirärin Jesusta: ⁴“Yachrachig, cay warmitam tarirärimun juc olgowan cayagta. ⁵Chaura Moisés isquirbinganchrüga niyan chaynuy warmicunataga rumiwan chapinanchipagmi, nätan gamga, ¿ima ninquitag?” ⁶Chaynuy nipäcura: “¿Pagta lutanta rimarachichwansi juchachänanchipag?” nirmi.

Chaura Jesusga lipurpuyurmi pampachru isquirbiyta galacuyun dëdunwan. ⁷Nätan chaynuyla tapupäcuptinmi Jesusga nuquircur cay nin: “Gamcunapita maygaysi mana juchaynagcag, galayapäcuy wac warmi gompayta”. ⁸Nircurga yapay lipurpuyurtan chay isquirbiyanganta ushapayara. ⁹Nätan chay nigta

mayarärirga juchayog capácunganta tantiacarärirga yargarärin jucpacamam, chachanninpita galayur lapan shulcacunas. Nä lapan yargaräriptin Jesusga ricacarun discipuluncunalawanmi, jinamanmi chay warmi shayachipácungalanwan. ¹⁰Chaura Jesusga sharcurcurmi warmita cay nin: “Mamala, ¿maychrütac cayan ‘Juchäcusham’ nircayäshugniqicuna? ¿Manachu maygansi ‘Juchanpita cunchuchisha cachun’ nishunqui?”

¹¹Niptin warmiga nin: “Manatar tayta, maygansi”.

Niptin Jesusga cay nin: “Manam nogasi ‘Juchanpita cunchuchisha cachun’ niyta munagchu. Gamsi aywacuy, nätan amam yapayga juchäcunquichu” nin.]

Achquicuna rupayaptin juc achquinuy canganpita Jesús rimangan

¹²Chaypita Jesusga yapaytan chay ninacurcayag runacunata rimaparatac cay nir: “Noga cä juc achquinuyi cay pachachru runacunapag. Pi maysi cäsucamagga, manam nä juchäcuyarchu cawanga juc yanauyagchru purignuyi, antis chrasquina cay achquiynuyi cayag ali cawachicugtam”.

¹³Niptin fariseocunaga cay nirärinmi: “Gamga quiquilaypita rimacunqui imapitas ali cayta munarmi. Chaynuy niptiquiga rimayangayga manam razoncagchu”.

¹⁴Nipäcuptinmi Jesusga cay nin: “Rimayangäga razoncagmi. Nogapita quiqui rimayaptisi. Nogaga musyayämi maypita aywamungätas, mayta aywayangätas. Nätan gamcunaga manam musyapäcunquichu maypita aywamungätas ni mayta aywayangätas. ¹⁵Gamcunaga juchata taripapäcunqui tantiaylaycunapitam. Nogaga manam

pitas juchanta taripächu quiquiipa tantiaylapitaga. ¹⁶Nätan tariparga razoncagtam taripä juchanta pitas. Nogaga manam japalächu rurä, antis cachramagnï Tayta Dios munangannuyi. ¹⁷Moisés isquirbinganchru cay niyanmi: 'Ishcay runacuna ricangantas u musyangantas chaynuylata rimacurcayaptinga razoncagmi' ninmi.

¹⁸Chauraga nogam cayä jucga, quiquiipita rimag, nätan cachramag Taytämi cayan jucga, nogapita rimag”.

¹⁹Niptinga cay nipäcuram: “¿Maychrüttag cayan taytayqui?”

Nipäcuptin Jesusga “Gamcunaga manam musyapäcunquichu noga pi cangätas, manatan musyapäcunquichu Tayta Diospitas. Nogata reguepäcamarga Tayta Diostas reguepäcunquimanmi” nirun.

²⁰Chaycunata Jesús yachrachira Diospa wayin sawan ruwichru mandacuna goturarcayag mayananpagmi Diospag golgue gotucurcänancagpa. Nätan mana pisi charirachu wanuchipäcunanpag, manarag üran aypamuptinmi.

“Aywangäman manam gamcuna aywamuyta atipapäcunquichu” ningan

²¹Chaura Jesusga yapaytan chay runacunata cay nin: “Nogaga aywacümi, gamcuna ashipäcamanquim. Nätan wanupäcunqui chaynu yuchasapalam. Chaura noga aywangämanga manam chrämuyta atipapäcunquichu”.

²²Niptin chay castäcunaga cay nipäcuram: “¿Maychrüsi quiquinchur wanuchicurunga? ¿Chaychur niyan mana paycagman chrayta atipänanchita?”

²³Nipäcuptinmi Jesusga cay nin: “Gamcunaga cayanqui caylapitam.

Nogaga cayä janapitam. Gamcunaga cayanqui cay pachapitam. Nogaga manam cä cay pachapitachu. ²⁴Chaymi nircayag juchalaycunachru wanupäcunaypita. Chauraga ‘Nogam cayä’ ningäta, mana chrasquipäcurga wanupäcunqui chaynu yuchasapalam”.

²⁵Niruptinga tapupäcura: “¿Pitag gam cayanqui?”

Nipäcuptin Jesusga “Chaytaga galayunanpitam nä nipäcurag:

²⁶Maymaytachr gamcunata ninä cayan, jinaman ima juchaycunatas nipäcunagran cayan. Nätan

cachramagnïga razoncaglata rimagmi. Nogaga paypita mayangätam rimapayä cay pachachru runacunata. ²⁷Nätan chay runacunaga manam

tantiapäcurachu Tayta Diospita rimapaptin” ninmi. ²⁸Chaymi Jesusga cay nin: “Noga jana pachapita

shamusha runata warcarärimar-ran tantiapäcunqui gamcunaga ‘Nogam

cayä’ ningätas, jinaman quiquiipa yarpayläpita mana ima-ayga rurangätas,

jinaman Tayta Dios yachrachimangannuyta rimangätas.

²⁹Cachramagnïga nogawanmi cayan. Manam japalätaga dejamanchu, pay

munangannuyta imaysi rurapti”. ³⁰Jesús chaynuypa niruptinga achcam runacuna payta chrasquicarärin salvacugnin cananpag.

Diosta chrasquishacunapita jinaman juchalanchru cawagcunapita Jesús rimangan

³¹Chauraga chay chrasquicusha castäcunatam Jesusga cay nin: “Gamga

noga ningäta cäsucur cawarga, capäcunqui razonpa nogapa discipulümi. ³²Jinamanmi

reguepäcunqui razoncagta, nätan chay razoncagmi jucpa munayninpita cachrarichipäcushunqui”.

³³Niptinmi cay nirärin: “Nogacunaga capäcü Abrahampa castan aywagmi, nätan manam imaysi capäcurächu pipa servigninsi. ¿Imanirtag nircayämanqui ‘Cachrarisham capäcunqui’ nirga?”

³⁴Nipäcuptin Jesusga cay ninmi: “Razoncagtam nircayag; Pisi juchäcuyar cawagga, chaynu y juchäcuyälarmi cawan. ³⁵Juc rantisha runaga manam chaynuylachu imaycamas chay rantigninpa maquinchru can. Nätan chay rantigpa churinmi ichaga cayan paywan imaycamas. ³⁶Chauraga Diospa-mayin, chay jucpa munayninpita jorgarärishuquim ichaga razonpa capäcunquiga juc cachrarishanuy.

³⁷Musyayämi Abrahampa castan capäcungayta. Nätan wanuchimayta munarcayämanqui nogas nircayangagta mana chrasquiyta munapäcurmi.

³⁸Nogaga rimayä Tayta Dioscagchru ricangäcunatam. Nätan gamcunaga rurarcayanqui taytay rurachipäcushungaytam”.

³⁹Niptinmi “Taytäcunaga Abrahammi” nirärin.

Chaura Jesusga cay ninmi: “Garcunaga razonpa Abrahampa castan aywag carga, rurapäcunquiman pay rurangannuy. ⁴⁰Nätan gamcunaga wanuchiyta munarcayämanqui ‘Razonpacagta Dios nimanganta’ niruptimi. Abrahamga manam chaynuychu rurara. ⁴¹Garcunaga rurarcayanqui taytaycuna rurangannuytam”.

Niptinmi paycunaga cay nirärin: “Nogacunaga manam capäcü churipäcuychu. Nogacunapaga juclay Dioslam taytäcuna cayan”.

⁴²Chaura Jesusga cay ninmi: “Taytaycuna razonpa Dios captinga cuyapäcamanquimanmi. Nogaga Diospitam aywarayamüsi, nätan caychrüsi cayä. Nogaga manam

aywamusha cä quiquiläpitachu, antis Dios cachramasha captinmi.

⁴³Garcunaga niyangäta mana tantiayta atipapäcunquichu imaysi, rimayangäta mana mayacuyta munapäcurmi.

⁴⁴Garcunapaga taytaycuna cayan Asyagmi. Pay munangantam garcunaga rurayta munarcayanqui. Asyagga galayunanpita-pacham runa wanuchig, nätan payga manam imaysi razoncagpita rimanchu. Manatan imaysi razoncagtaga rimarapishchu. Nä rimarga casquitam riman, casquilata rimag car. Jinamanga paymi chay casqui rimagcunapa taytan. ⁴⁵Nätan nogataga razoncagta rimaptimi mana chrasquicarcämanquichu. ⁴⁶¿Maygaytag garcunapita ‘Caytam juchäcurayanqui’ nipäcamanquiman? Nätan razoncagta rimayaptiga, ¿imanirtag ‘Payga Diospitam’ mana nipäcamanquichu? ⁴⁷Diospacagga pisi cäsucunmi Dios rimanganta, nätan garcunaga Diospa mana capäcurmi cäsucuyta mana munapäcunquichu”.

⁴⁸Chaura chay castäcunaga Jesús niruptinga cay nirärinmi: “Nogacunaga alitamau Samaria runanuysi pengapaypagmi, jinaman Asyagpa munayninchrümi cayanqui” nircayag.

⁴⁹Nipäcuptinmi Jesusga cay nin: “Nogaga manam Asyagpa munayninchrüchu cä, antis nogaga Tayta Diostam alawayä. Jinatam garcunaga nätan ashlicayämanqui. ⁵⁰Nogaga manam munächu alawasha cayta. Alawasha canäta juc munayaptinsi. Payga juchacuna taripagmi. ⁵¹Shumag mayacurcay: Pisi rimayangäta cäsucamagga manam imaysi wanungachu”.

⁵²Niptin chay castäcunaga cay nirärinmi: “Cananga shumagmi musyaräri Asyagpa munayninchrü cayangayta. Abrahamwan Diospa unay

willacugnincunaga lapanmi wanupäcusha. ⁵³Nätan ‘Noga ningäta cäsucamagga manam imaysi wanupäcungachu’ nircayämanquim. ¿Gamga cayanqui taytäcuna Abrahampitaga mas alinnincagchu? Payga wanusham, nätan wanupäcushatan Diospa unay willacugcunas. ¿Gamga mayganmi cayä ninquitag?”

⁵⁴Nipäcuptin Jesusga cay ninmi: “Quiqui alawacuptiga, chay alawacuyangäga manam välinchu. Nätan nogataga alawäman. ‘Diosnïcunam’ nircayangay Dios-mayïmi nirunmi. ⁵⁵Nätan gamcunaga manam reguepäcunquichu payta. Nogam icha regueyäga. ‘Manam payta reguechu’ nirga cäman gamcunanuysi casquim. Nätan nogaga regueyä razonpam, jinaman cäsucüsi pay nimangantam. ⁵⁶Taytaycuna Abraham cushicuram unay, cayman aywamunä junagpita. Nätan aywamugta ricaramar aliscam cushirura”.

⁵⁷Niptin chay runacunaga cay nirärinmi: “Manaran pichga chrunca watayogsi canquiragchu. Nätan ¿‘Abrahamta ricapurämi’ ninquichu?”

⁵⁸Nipäcuptinmi Jesusga cay nin: “Mayapäcamay shumag: Nogam cayä chay ‘Nogam cayä’ ninganga. Chauraga Abraham manaragsi näcimungalanpitam noga Diosga cayä”.

⁵⁹Niptinga rumitam charirärin Jesusta gompapäcunanpag. Payga nätan pacacurunmi. Chaypitam Diospa wayinpitaga runacunapa chraupinpa yargorcur aywacun.

Ñausha näcimusha runata Jesús cuticächingan

9 ¹Chaypitam Jesusga aywayanganchru ricapurun näcimunganpita-pacha ñausha runata.

²Paypitam discipuluncunaga tapuräri cay nir: “Yachrachig, cay runa ñausha näcimunanpag ¿pipatag juchan? ¿Quiquin runapachu, icha taytanpawan mamanpachu?”

³Nipäcuptimi Jesusga cay nipäcaman: “Cayga ñausha cayan manam quiquinpa juchanpitachu ni taytancunapa juchancunapitapishchu, antis chaynuy cayan Tayta Dios munayniyog canganta paychru reguechicunanpagmi.

⁴Junagcuna cayangancama uryashagran cachramagni ruranäpag nimangancunataga, nätan nämi aywayämün juc pagasnuysi. Chaychrüga manam pisi uryayta atipanganchu. ⁵Cay pachachru cayangäcamaga cayä juc achquinuymi cay pachachru runacunapag”.

⁶Chay nircurmi Jesusga pampaman togarpuhur ruraran uchuc isgueralata dëdunwan. Jinarcurmi chaywan lushirun chay ñaushapa ñawinta. ⁷Chaypitam cay nin: “Ayway Siloé ningan gochranyaman”. (‘Siloé’ ninanga ‘cachray’ ninanmi.) Chaura ñaushaga aywacunmi. Jinarcurmi maylacurcurga nä ricapuyar aywacun.

⁸Chauraga chay ñausha yachrangnapa yachragcunaga, nätan ñausha canganta ricagcunaga cay nipäcuram: “¿Manachu cayga golgueta manacuyar tayag runa?”

⁹Nipäcuptinmi waquina “Au, paymi” nipäcura. Waquinmi “Pay nirayanmi” nipäcura. Nätan payga “Chay quiquinmi cayä” nira.

¹⁰Chauraga tapurärira: “¿Imanaypatag cananga ricapuyanqui?”

¹¹Nipäcuptin payga cay ninmi: “Jesús nipäcungan runam isguerata rurarcu lushiraman ñawita. Chaypitam ‘Siloé ningan gochranyata maylacug ayway’ niranam”.

Nimaptinmi aywarä. Jinarcurmi maylacurcurga ricapurü.

¹²Niptinga tapurärin: “¿Maychrüttag cayan chay runa?”

Nipäcuptin payga “Manam musyächu” niram.

¹³Chaura runacunaga pusharärin chay ñausha cuticashatash fariseocunapa naupanman. ¹⁴Nätan Jesús chay ñaushata isguerawan lushircur cuticächinan junag cara jamana junagmi. ¹⁵Chauraga fariseocunash chay runataga tapurärintag imanuyapa ricapungantas. Chaura payga cay ninshi: “Ñawitam isguerawan lushiraman chayta maylacururmi cananga ricapuyä”.

¹⁶Niptinshi waquin fariseocunaga cay nipäcun: “Chay rurag runaga manam canmanchu Diospitaga jamana junagta mana cäsuyarga”.

Nätan waquincunash nipäcun: “¿Imanaypatag mana pisi ruray atipänanta cayga runanman juchasapa carga?” nirga, juc ishçay puntaman raucarärinag.

¹⁷Chaura chay ñausha cuticashatam yapay tapupäcusha cay nir: “Nätan gamga ¿pimi ninquitag chay ñawiqui cuticächig runata?”

Nipäcuptin payga “Nogapitaga Diospa willacuginmi” nisha.

¹⁸Nätan Israel castacunaga mandagnincunaga “Yangam cay runaga ‘Ñaushapitam cananga ricapuyä’ niyan” nipäcuram, chay runapa taytanwan mamanta gayapäcungancamaga. ¹⁹Nä chraruptinga tapurärin cay nirmi: “¿‘Ñausham näcimusha wamraläga’ nipäcungaychu cay runaga cayan? ¿Imanuypatag cananga ricapuyan?”

²⁰Nir tapupäcuptinga cay nirärinmi: “Au. Musyarcayämi cay runa wamräcuna cangantas, jinaman ñausha näcimungantas. ²¹Nätan manam musyapäcüchu imanuyapa ñawin cuticangantas ni pi cuticächingantas. Nä

chacha runam cayan. Tapupäcuy quiquinta nipäcushunaypag”.

²²Chaynuypa nipäcusha paycunata manchacurcarmi. Chaypagga nämi Diospa wayinchru chay mandagcunaga rimanacarärinag “Jesusga razonpa salvacugmi” nigcagta pitas chay Israel castäcuna gotucarcänan wayipita gargosha capäcunanpag. ²³Chaymi mamanwan taytanga “Payta tapupäcuy, nä chacha runam” nirärin.

²⁴Chaura chay mandagnincunaga yapaymi gayarärin chay ñausha cuticashata. Chaypitam cay nirärin: “Diospa naupanchrümi cayanchi. Nipäcamay razoncagta. Nogacunaga shumagmi musyarcayä chay cuticächishugniqui runa juchasapa cangantam”.

²⁵Nipäcuptinmi payga cay nisha: “Manam noga musyächu juchasapa cangantas u mana cangantas. Musyayäga ñaushapita cuticächimangalantam”.

²⁶Niptinga yapaymi tapurärin: “¿Imanarushuraytag? ¿Imatam rurarushunqui ñawiqui ricapunanpag?”

²⁷Nipäcuptinmi payga cay nin: “Nämi nipäcurag. Gamcuna manatag mayaytas munapäcuraychu. ¿Imanirtag yapay mayayta munarcayanqui? ¿Gamcunas paypa discipulun caytachu munarcayanqui?”

²⁸Niptinga ashliytam galacayärin cay nir: “Gamchri cayanqui chaypa discipulunga. Nogacunaga capäcü Moisespa discipulunmi. ²⁹Nogacuna musyarcayämi Moiesta Dios rimapanganta. Nätan chay cuticächishugniqui runataga manam musyapäcüchu maypita cangantas”.

³⁰Nipäcuptinmi runaga cay nin: “¡Chay rimayniquicunaga mayaräcuypagtag! ¿Gamcuna manachu tantiapäcunqui maypita cangantas

ñawita cuticarayächimaptin?

³¹Noganchiga musyayanchim juchasapacunata Dios mana mayanganta, natan payta alawagcunalata, jinaman cäsucugnincunalata mayanganta. ³²Manam imaysi mayaranchichu juc ñausha näcimushata pisi cuticächinganta. ³³Natan cay runa Diospita mana aywamusha carga, manam ima ruraytas atipanmanchu”.

³⁴Niptinmi cay nirärin: “¡Näcimungaypita-pacha gam juchasapachu nogacuna yachrachipäcamayta munayanqui!” Nirmi chay Israel castäcuna gotucarcänan wayipita gargapäcusha, paycunapita juc wanushapagnuy ricasha cananpag.

**Ñaushanuysi capäcunganta
Jesús ningan**

³⁵Natan Jesusga musyaruram chay cuticasha runata chaynuy rurapäcunganta. Chaypitam tincurur chay runata Jesusga cay nin: “¿Gamga jana pachapita shamusha runata chrasquicunquimanchu?”

³⁶Niptinmi runaga cay nin: “Tayta, ¿pitag chay cayan? Niyämänar chrasquicunäpag”.

³⁷Niptin Jesusga cay nin: “Nämi ricapusha canqui. Nogam cayä gamwan rimayagmi”.

³⁸Chaura niptin runaga Jesuspa naupanmanmi gongorpacuyur: “Salvamagnimi cayanqui” nirmi chrasquicurun.

³⁹Niptinmi Jesusga cay nin: “Cay pachaman noga shamurä ñaushanuysi cayagcuna tantiacurcänanpagmi, natan ricapuyagnuysi cayagcuna ñaushanuysi capäcunanpagmi”.

⁴⁰Nigta mayaräirimi juc ishchay paywan chaychru cayag fariseocunaga

cay nirärin: “Nogacunaga manam capäcü ñaushanuychu”.

⁴¹Nipäcuptinmi Jesusga cay nin: “Gamcuna razonpa chay ñaushanuysi chrasquicarcämarga mana juchaynagmi capäcunquiman. Cananga natan ricapuyarsi mana chrasquicarcämangaypitam chaynuy juchayogla capäcunqui”.

10¹“Mayapäcamay shumag: Pi maysi uysha canchraman mana puncupa yaycugga, maypas jucläpa yaycugga capäcun suwawan imas lutan ruraglam. ²Natan chay canchra puncupa yaycugga cayan uyshacuna michigmi. ³Paytaga chay puncu cuidagsi quichranmi yaycunanpag, natan uyshacunas shiminta mayanmi. Chay michigga uyshacunatas jutimpa camam gayan. Chaypitam jorgamun washaman. ⁴Nä lapanta jorgarcamurga chay uyshacunapa naupantam aywan. Jinatam uyshacuna gatirapäcun michigninpa shiminta reguepäcur. ⁵Natan mana reguengantaga manam gatirapäcuncho, antismi jucpa shiminta mayarurga gueshpicurcan”. ⁶Jesús chaynuy tincuchiypam yachrachira. Natan paycunaga manam tantiapäcurachu ima niyta munayangantas.

⁷Chaura Jesusga yapaymi cay nin: “Razoncagtam nircayag: Nogam cayä uysha canchraman yaycuna puncunuy runacunapag. ⁸Diospitam aywarayämü’ nigtucugcuna lapansi capäcun suwacunam jinaman lutan ruragcunam. Natan uyshacunaga manam cäsüpäcushachu. ⁹Nogaga natan cayä chay canchra puncunuyymi. Pi maysi nogapa yaycugga salvasham canga. Chaypitam yaycunga jinaman yargamunga. Natan micushanuymi canga. ¹⁰Suwaga aywamun apanalanpagmi, wanuchinalanpagmi,

wichicächinalanpagmi. Nätan nogaga aywarayämü imaycamas ali cawapäcunaypagmi.

¹¹Noga cayä ali michigmi. Ali michigga wanunmi uyshacunata raygo.

¹²Nätan pi maysi gänanan raygola uryagga, micug aywamugta ricapururga uyshacunata dëjarcurmi aywacun. Chaynuy jinan mana uysha michig carmi, nätan mana paypa uyshan captinmi. Chaura atog charirga wichicächinmi. ¹³Chay runaga aywacun gänanan raygola uryarmi, nätan uyshacunatas manam cäsunchu.

¹⁴Nogam cayä alisca ali michigga. Regueyämü uyshacunata, nätan nogatas reguepäcamanmi. ¹⁵Nogatachu Dios-mayï regueman. Nätan nogachu payta reguë chaynuymi. Jinaman wanushagsi chay uyshäcuna raygom.

¹⁶Cayäpaman masmi uyshäcuna, cay canchrachru manacagcuna. Paycunatas aywachimushagmi, nätan cäsucapäcamangam paycunaga. Chauraga canga juclay canchrachrümi lapan, jinamanmi canga juclay michigla.

¹⁷Dios-mayï nogata cuyaman ‘Caycuna raygo nogam wanushag’ niptümi. Nätan nogaga gangalantam cawacämushag.

¹⁸Manam pisi wanuchimanchu nogataga, antis quiquï munarmi nogaga paycuna raygo wanuyta munä. Nogapagga munaylächrümi cayan paycuna raygo wanuyti, nätan cawacämuyti. Chaynuy ruranäpagmi Tayta Dios nimasha”.

¹⁹Nigta mayarur chay castä mandagcunaga yapaymi ishca y puntaman raquicarärin. ²⁰Achcam paycuna casta cay nipäcura: “¿Imanirtag cäsucurcayanqui Asyagcunapa munayninchru cayagta, jinaman löcusha cayaptin?” nir.

²¹Nätan waquinmi cay nipäcura: “Manam pisi Asyagga munayninchru

cagga, caynuy rimaytas ni ñaushacunata cuticächiytas atipanmanchu” nir.

**Diospa wayinchru mandagcuna
Jesusta mana chrasquipäcungan**

²²Chaura Jerusalenchrüga cayara Tayta Diosta yapay ‘Gampa cay wayiquiga cachun’ nipäcungan fiestam. Nätan caras taya wichanmi. ²³Chaura Jesusga puriyara Diospa chay wayinchrümi Salomonpa ramädan ninganchru. ²⁴Chaypitam chay castä mandagcunaga muyurärin jinarcarmi cay nirärin: “¿Imaycamatag shuyag shuyagta cachipäcamanqui? ‘Salvacugtam cachramushag’ Dios ningan gam carga juclar willapäcamay shumag”.

²⁵Nipäcuptinmi Jesusga cay nin: “Nämi nipäcurag, nätan ‘Manam razonchri’ nir chrasquipäcamaraychu. Dios-mayï nimanganta rurangäcunachrümi musyacayan shumag noga pi cangäsi. ²⁶Nätan gamcunaga manam ‘Payga razonpa Diospitam’ nipäcamanquichu, mana nogapa runäcuna casta capäcur, naupata uyshacunapita rimapangänuyti. ²⁷Nogapa uyshäcunaga reguercayanmi shimüta. Nätan nogasi reguëtan paycunata, jinaman cäsucarcämanmi. ²⁸Nogaga paycunata cawachishagmi imaycamas, nätan manatan imaysi wanupäcungapishchu ni pisi jorgapäcungapishchu maquïpitas. ²⁹Paycunata gomag Dios-mayïga pipita maypitas mas munayniyogmi. Paypa maquinpitaga manam pisi quítayta atipanmanchu. ³⁰Paywan nogaga capäcü Diosmi”.

³¹Niptin chay castä mandagcunaga yapaymi rumita charirärin gompapäcunanpag. ³²Chaura Jesusga cay ninmi: “Alicusa achcatam ima-ayga alicunatas rurasha cä gamcuna

ricarcayämaptiqui chay Dios-mayipa munayninwan. Cananga ¿maygan rurangäpitam chapipäcamanqui?”

³³Niptinmi chay castä mandagcunaga cay nirärin: “Manam nogacunaga chapipäcushay chay ali rurangaycunapitachu, antis Diosta ashlingaypitam, nätan runala cayar Diostucungaypitam”.

³⁴Nipäcuptinmi Jesusga cay nin: “Gamcunaga ‘dioscunam carcayanqui’ niyanmi isquirbishachrüga. ³⁵Chaura chay cäsucugcunata ‘dioscunam’ niyaptinchi ¿chay isquirbishacunaga manacagman chrurasha canga?”

³⁶Chauraga Tayta Dios munanganta ruranäpag acrarayämaptinga, jinaman cay pachaman cachrarayämaptinga ¿imanirtag gamcunaga nätan ‘Diostam ashliyanqui’ nircayamanqui, Diospa-mayin cayaptiä? ³⁷Tayta Dios nimangancunata mana rurayaptiä ama chrasquipäcamaychu. ³⁸Nätan pay nimanganta ruraptiä, mana nogata chrasquimarsi ‘Cayga razonpa Diospitam’ nipäcuy, rurayangäcunalatas. Tayta Dios nogachru canganta, nätan noga Tayta Dioswan cayangäta cananpita shumag musyapäcunaypag”.

³⁹Niruptinga Jesús chariruytam yapay munapäcura, nätan payga maquincunapitam gueshpirura.

⁴⁰Chaura Jesusga cutira nogacunawanmi Jordán mayuman inti yargamun läduman, naupata Juan bautizangancagman.

⁴¹Runacuna achcam aywapäcura Jesús ricag. Jinarcurmi rimapäcura cay nir: “Juanga manam rurashachu mana runa ruray atipänantaga. Nätan cay runapita Juan rimanganmi icha cayanga lapansi razoncagla” nir.

⁴²Chaychru achcam runacuna “Payga Diospitam razonpa” nir chrasquicurchasha lapan shongonpa.

Lázaro wanungan

11 ¹Chauraga gueshyarunag Lázaro nipäcungan runam. Payga yachrara Betania ichic marcalachrümi ishchay paninwan. Paycunapa jutin cara Mariawan Martam. ²Chay gueshyag Lazaropa panin Mariam cara taytanchipa chraquinman perfümita jirpurcur chay agchanwan chaquichig.

³Chauraga chay panincunam ishchay junag camiiu aywanata cachrarärimunag Jesusman “Tayta, cuyangaymi gueshyayan” nipäcunanpag.

⁴Nipäcugta mayarur Jesusga cay ninmi: “Cay gueshyaga charirun manam imaycamas wanusha cananpagchu. Antis chay gueshyaga charirun Dios munayniyog cananganta musyapäcunanpagmi, jinaman Diospa-mayin munayniyog cangäta runacuna musyapäcunanpagmi”.

⁵Jesusga alicam cuyara Martatas nanantas turin Lazarotas. ⁶Nätan Lázaro gueshyayanganta musyayarsi chaychru cara ishchay junagran.

⁷Chaypitam discipuluncunata cay nipäcaman: “Aywashun yapay Judeata”.

⁸Nipäcamaptinmi nogacunaga cay niräri: “Yachrachig, quima chruscu junaglaragtag cayan wacchru mandagcuna chapiypa wanuchiyta munapäcushungay. Nätan ¿yapaychu wac aywayta munayanqui?”

⁹Nipäcuptimi Jesusga cay nipäcaman: “Manam üraragchu wanuchipäcamänapag. Chrunca ishchayniyog üratam noganchiga juc junag ninchi. ¿Au? Chaura junagpa purirga manam mitcanchichu achicyaptin. ¹⁰Nätan pagaspa purirga mitcanchi mana achicyaptinmi. Chaynuymi mana wanuchiyta atipapäcamangachu mana ürä

chrämuptinga”. ¹¹Nircurmi Jesusga cay nin: “Cuyanacunganchi Lazaroga nämi jamayan. Nätan aywayä sharcachigmi”.

¹²Nipäcamaptin discipuluncunaga cay nipäcumi: “Tayta, chaura jamayarga sharcungachri”. ¹³Nätan Jesusga Lázaro wanusham nipäcamänagmi. Chaytam nogacunaga tantiarärinä jamaypita rimayanganta.

¹⁴Chaura Jesusga shumagmi musyarärichiman cay nir: “Lazaroga wanusham. ¹⁵Cushirayämi chaychru mana cangäpita. Chaynuy mana cangä gamcunapag mas alim, ‘Payga razonpa Diospita’ nir mas yupachircämänaypag. Chauraga aywashun ricag” nipäcaman.

¹⁶Nipäcamaptinmi mellishu nipäcungä Tomasga: “Noganchisi aywashun paywan parëju wanunanchi captinsi” nipäcaman.

**“Nogam cä cawachigsi, nätan
wanushapita cawacächimugsi”
Jesús ningan**

¹⁷Nä Betaniaman chrarur Jesusga Lazarota tarirun nä chruscu junag enterracusha cayagtam. ¹⁸Chay marca cara manam alä caruchrüchu Jerusalenpita. Caraga lamitä liwapita mascascalam. ¹⁹Nätan achcam Diospa wayinchru uryagcuna aywarärimunag Martata Mariata “Amar wagaychu turiqipita” nipäcunanpag. ²⁰Chaura Martaga nä wayinman nachrgayagta Jesuspita musyarurga yargaramun taripacugmi, nätan Mariaga wayinchrümi quëdaramunag.

²¹Chaura Martaga Jestusa cay ninmi: “Tayta, caychru gam captiquiga manachr wanunmanchu cara turilä.

²²Nätan musyayämi Diosta canan manacuruptiqui mayashunaytas”.

²³Niptinmi Jesusga cay nin: “Turiquiga cawacämungam”.

²⁴Niptinmi Martaga cay nin: “Au. Musyayämi wanushacuna cawacämunan junagchru cawacämunanta”.

²⁵Chaura niptinga cay nirunmi: “Nogam cayä wanushata cawacächimugsi, nätan cawachigsi. Pi maysi chrasquicamagga wanursi cawacämungam.

²⁶Nätan lapan cawayagcunasi chrasquimagga manam imaycamas wanushalachu capäcunga. ¿Cay niyangäta ‘Razonmi’ ninquichu?”

²⁷Niptinmi cay nin: “Au tayta. Cananga shumagmi musyarü ‘Salvacugtam cachramushag’ Dios ningan jinaman Diospa-mayin gam cangayta”.

²⁸Nircur Martaga aywacun nanan María gayagmi. Jinarcurmi japalanta cay nin: “Yachrachigmi chrarayämun. Gamtam gayayäshunqui”. ²⁹Niruptin Mariaga pasay-pacham aywaramunag.

³⁰Chaypagga manam Jesusga yaycuraragchu marcaman. Cayara Martawan tincungalanchrümi. ³¹Chaura María wayrala sharcurcur yargamugta ricarärirga chay wayinchru cayag runacunaga gaträpämunag “Michucagtachr aywayan wagag” nipäcurmi.

³²Chaura Jesús cayanganman María chraramurga, Jesuspa naupanmanmi gongorpacuyun cay nir: “Tayta, caychru gam captiquiga manachr wanunmanchu cara turilä” ³³nir, wagacuptinga, jinaman paywan carcayag runacunatas wagarcayagta ricapururga Jesusga aliscam laquicurun jinamanmi cuyaparun. ³⁴Chaypitam tapurun: “¿Maymantag enterrarärinqui?”

Niptinmi “Tayta, shamuy ricanaypag” nirärin. ³⁵Nätan Jesusga wagacunmi.

³⁶Chaura chay sacerdotícunapa mandagnincunaga “¡Jay, aliscachrau cuyara!” nipäcunmi.

³⁷Nätan waquincagmi runacunaga “Cay runa chay ñaushapa ñawintas cuticayächirga manachrau imalatas rurayta atiparachu Lázaro mana wanunanpag” nipäcuratan.

Lazarota Jesús cawacächimungan

³⁸Chaura Jesusga yapay alisca laquisham mïchucagman ashuyurun. Chay mïchu canag juc machraymi juc jatun lagta runiwan wichrgasha.

³⁹Chaura Jesusga “Rumita jorgapäcuy” ninmi.

Chaymi wanushapa panin Martaga cay nin: “Tayta, nähri asyarirayan, nämi wanunganga chruscu junag”.

⁴⁰Niptin Jesusga cay ninmi: “¿Manachu nogaman yupachicurga Dios munayniyog canganta ricanquim nirag?” nir.

⁴¹Chauraga jorgaräin rumitam. Chaypitam Jesusga jana pachata rircärir cay nin: “Tayta, ‘Gracias’ nicug, gamta manacungänuy rurangaypitam. ⁴²Noga musyayämi chaynuyla mayamangayta. Nätan niyagsi caychru runacuna, ⁴³gam cachramangayta musyarur yupachicarcämänapagmi”. Nircurmi gayacuypanuy: “¿Lázaro, yargamuy chaypita!” nirun. ⁴⁴Chaura wanushaga yargaramun maquinpita, chraquincama inchrasham. Nätan cäranmi juc sagpiwan wancusha.

Chaura Jesusga “Pasquipäcuy purinanpag” ninmi.

Jesusta wanuchipäcunanpag rimanacungan

(Mt 26.1-5; Mr 14.1-2; Lc 22.1-2)

⁴⁵Chauraga María ricag chay aywamusha sacerdotícunapa mandagnincunaga achcam chrasquicaräin Jesusta chay Lázaro cawacächimugta ricarärir. ⁴⁶Nätan waquinmi aywapäcusha fariseocunaman

Jesús chay ruranganta willapacug.

⁴⁷Chaura fariseocunawan sacerdotícunapa waquin mandagnincunaga gotucaräinag quiquin mandagcamalam rimanacurcänapag. Chaychrümi cay ninacurcasha: “¿Imatag rurachwan chay runata? Aliscatag ima-aygatas rurayan mana pisi ruray atipänancunata. ⁴⁸Jinata rircarashaga cay runanchicunaga lapanmi chrasquicaräinga. Jinatam Romachru mandagcunaga aywarcärimur Diospa wayintas jinaman noganchi acrashan runancunatas imantawansi pampanman rurarämäshun”.

⁴⁹Nätan nipäcuptinshi paycuna castapita Caifás nipäcunganga, chay wata Diospa wayinchru mas mandagnincagga cay nin: “Gamcunaga manam musyapäcunquichu. ⁵⁰Manatan tantiapäcunquishichu alitaga. Nogapitaga cay lapan runacunapa janan juclay runalam wanunman lapanchita ushamänanpitaga” nirun.

⁵¹Nätan Caifás chaynuyl nira manam quiquinpa yarpaylanpitachu, antis nira chay wata Diospa wayinchru mas mandagnincag carmi, Tayta Dios rimachiptin, Israel casta runacunapa janan Jesús wanunanpita. ⁵²Manam cay runacunalapagchu, antis Diospa lapan castancuna maychru chaychru cagtas juclaman gotunanpagmi. ⁵³Chaura chay junagpitam chay mandagcunaga rimanacusha capäcura Jesusta wanuchipäcunanpag.

⁵⁴Chaymi Jesusga nä mana purirachu chay mandagcuna ricayga. Antis Judea ninganpitaga yargor, aywacura jäpag pampaman Efraín ningan marcacagpam. Chaychrümi Jesús cara nogacuna discipuluncunawan.

⁵⁵Chauraga nämi pasay nachrgarayämura Pascua nipäcungä

fiestäcunapag. Jinarcurmi chay marcacunapita runacunaga achca aywapäcura Jerusalenta manaragsi fiesta chrämuptilan Dios ningannuy maylacurcänanpag. ⁵⁶Chaura chay runacunaga Jesustam ashipäcunag, nätan Diospa wayinchrüga tapucurcänag jucta juctam: “¿Ima nipäcunquitag? ¿Aywamungachur fiestaman icha manachur?” nir. ⁵⁷Nätan fariseocunawan, sacerdotícunapa mandagnincunaga rimanacarärinag maychrüsi Jesús cayagta pisi musyarga willacurcänanpagmi, chaypita charig aywapäcunanpagmi.

**Jesupa chraquinman
perfümita jirpungan**
(Mt 26.6-13; Mr 14.3-9)

12 ¹Chauraga sogta junagta nä Pascua fiesta galayunan cayaptinmi, Jesusga aywara Betaniata chay wanushapita cawacächimungan Lázaro yachranganta nogacunawan. ²Chaychrümi yanupäcarärin cénata Jesusta garapäcunanpag. Chaura Marta garachracuyaptin Lazaroga, Jesuswanmi mäsacagman iscatararcayara. ³Chaymanmi Mariaga chrarachimun nardupita rurasha perfümita juc botëllawan alisca golgue chraninta. Jinarcurmi Jesupa chraquinman jirpurcur, agchanwan chaquirachin. Chaypita wayiga ima-ayga shumag asyarun.

⁴Chaura Simonpa churin Judas Iscarioteга chay wanuchipäcunanpag Jesusta reguechigga cay ninmi: ⁵“¿Imanirtag quima pachrac junag gänanachru mana ranticururanchichu cay perfümita mana imaynagcunata yanapänanchipag?” ⁶Judasga chaynuy nira manam paycunata cuyaparchu antis suwa carmi, nätan golgue runcu charanganpita jorgochrag carmi.

⁷Chaura Jesusga cay ninmi: “Jina rurachun. Caytaga chrurarächira wanunä junagpagmi. ⁸Mana imaynagcunaga gamcunawanmi imaysi cayanga. Nätan nogaga manam chaynuylachu cashag gamcunawan”.

⁹Chaura Israel castäcunaga achcam musyapäcusha Jesús Betaniachru cayanganta. Jinarcurmi chrarärimun chayman. Manam aywapäcamusha Jesús raygolachu, antis chay wanushapita cawacämusha Lázaro ricagnuyimi. ¹⁰Chaura Diospa wayinchrüga mandagcunaga rimanacarärinag Lazarotas wanuchipäcunanpagmi. ¹¹Paypa janan achca castäcuna chay mandagcunapita raquicarcur Jesusta chrasquicurcaptin.

Jesús Jerusalemman yaycungan
(Mt 21.1-11; Mr 11.1-11; Lc 19.28-40)

¹²Alicusa achcam runacuna Jerusalemman aywapäcamusha cara chay Pascua fiestapag. Jinarcurmi musyarärinag Jesús chay marcaman warantin chränanta. ¹³Chauraga rämacunata apacurcurmi yargarärimunag Jesús chrasquicug gayacuypanuy:

“¿Salvapäcamay!

Alisca ali nisha cachun Munayniyog Diosninchi cachramungan.

¿Alisca ali nisha cachun

Israelcunapa reynin!” nircayar.

¹⁴Nätan Jesusga püllu ashnuta tarircurmi logacurun isquirbishachru ningannuy. Chaychrüga cay niyanmi:

¹⁵“Ama manchacaychu Sión gotuchru yachragcuna.

¿Rircaripäcuy ashnuta logacurcur reyniqui aywayämugta!” niyanmi.

¹⁶Caycuna ruracayanganta galayunalanchrüga manam pasay tantiapäcurächu nogacunaga. Chaypita

nä Jesús jana pachaman aywaruptinran yarparäri lapan caycuna paypita isquirbisha canganta. Jinaman chay isquirbishanuyla paywan ruracanganta.

¹⁷Nätan Lazarota mïchupita gayagta, jinaman cawacächigta ricag runacunam willapacarärinag ricapäcunganta.

¹⁸Chaymi runacunaga yargarärimunag Jesusta chrasquicug, mana pi runas ruray atipänanta ruranganta musyaräri. ¹⁹Chaura fariseocunaga quiquincamash cay ninacaräri: “Chägar manatag Jesusta ima ruraytas atipanchichu. Rircaripäcuy lapan runacunam aywacurcan guepanta” nir.

Jesús cushicungan jinaman laquicungan

²⁰Jinarcurmi Diosta alawapäcunanpag fiestaman Jerusalenta aywamusha juc casta runacunaga juc ishçay, ²¹ashuyaräri Felipeman. Payga cara Galileachru Betsaida marcapitam. Jinarcurmi cay niräri: “Tayta Felipe, tincuytam munarcayä Jesuswan niyäripamay”.

²²Nipäcuptin Felipega aywarcur Andrestam nirun. Jinarcurmi ishçaynin Jesusta willaräri. ²³Chaura Jesusga cushisham cay nin: “Nämi chraramun noga jana pachapita shamusha runa, Dios cayanganman cuticunä junag.

²⁴Mayapäcamay shumag: Juc trigu mana alpaman ishquirga, gangalanmi cacun imaycamas, nätan alpaman ishquirurga achcatam camacun palanapag. ²⁵Pi maysi quiquin munangannuyla cawagga manam cawangachu nogawan. Nätan pi maysi cay pachachru wanunan captinsi cäsucamagga nä cawayan nogawanmi imaycamas. ²⁶Pi maysi nogapag cawayta munagga cäsucamächun, nätan cäsucamagga noga cangächrümi canga. Jinamanga Dios-mayipitas alinninpag ricasham canga”.

²⁷Nircurmi Jesusga cay nin: “Cananga manam pasay imananäsi musyacanchu. ¿Ima nishagtag ‘Tayta Dios, salvamay canan pasamänanpita’ nishagchur? Manam. Antis nogaga aywarayämü chaypagmi”. ²⁸Nircurmi “Reguechicuynar Dios-mayï, alisca munayniyog cangayta”.

Niptinga jana pachapitam mayaräri cay nimugta: “Nämi reguechicusha cä. Nätan yapaymi reguechicushag alisca munayniyog cangäta”.

²⁹Niptinga chaychru cayag runacuna mayaräringa “Räyum” nipäcunmi. Nätan waquina “Juc angelmi rimaparun” nipäcuntan.

³⁰Chaura Jesusga cay ninmi: “Cay rimamugta mayarunchi manam nogapagchu, antis gamcuna pi cangätas musyapäcunaypagmi. ³¹Cananmi cay pachachru juchacuna taripacanga. Nätan cananmi cay pachachru munayniyog Asyagsi washaman gargosha canga. ³²Nätan nogata gueruman nä warcarärimaptinga lapan runam nogaman aywamunga”.

³³Chaynuypa nira, imanuyya wanunantas tantiachipäcunanpagmi.

³⁴Niptin runacunaga nipäcunmi: “Nogacunaga chay isquirbishacunata leyiptin, mayacurcarä Cristo imaycamas cawacug cangantam. Nätan ¿imanirtag ‘Gamga jana pachapita shamusha runaga sharcachisharan canga’ niyanqui? ¿Pitag cayan chay jana pachapita shamusha runaga?”

³⁵Nipäcuptinmi Jesusga cay nin: “Ishçay quima junaglaga gamcunacagchru chay achquinuysi cayagga cashagran. Chauragar achquinuysi gamcunawan cayaptilan cawapäcuy nipäcushungaynuy, mayänipita chay juchalaychru mana quëdapäcunaypag. Pi maysi, yanauyagchru puriyagnuysi

juchalanchrürag cawayagga manam musyanchu mayta aywayangantas. ³⁶Chauragar gamcunachru juc achquinuysi cayaptilä chrasquicarcämay, cay achquinuysi cayagta, cay achqui cayagnuysi capäcunaypag”. Chaycunata nircurga, Jesús aywacuram. Nätan manam ricapachicurachu chay runacunawan.

¿Imanirtag waquin mandagcuna Jesusta mana chrasquicurcarachu?

³⁷Maymayta paycuna ricayaptin Jesús munayninwan rurayaptin si manam chrasquiyta munapäcurachu. ³⁸Diospa unay willacugnin Isaiaspa isquirbisha ningannuy ruracänanpagmi. Payga cay niram:

“Tayta, gamga musyachiraymi munayniyog cangayta. Nätan manam pisi chay willapacurcangäta chrasquicircashachu”.

³⁹Chaynu y mana chrasquicircaptinmi Isaiasga isquirbisha cay nirsi:

⁴⁰ “Paycunaga ñaushanuy caytam munapäcun, nätan rumi shongom capäcun, chaymi ñaushanuysi mana tantiapäcunchu. Manatan nogamanga cutipäcamunchu ni cuticächinäpagsi”.

⁴¹Isaiás chaynu y nira Jesús munayniyog canganta musyarmi.

⁴²Chaynu y isquirbisha cuna niyaptin si achcam marca mandagcunas chrasquicurcara Jesusta. Nätan Jesusta chrasquicugcuna manam willapacurcarachu pitas fariseocunata manchacur, chay Israel castäcuna gotucarcänan wayipita mana gargachicusha capäcunanpita, chaynu ypa juc wanushapagnuy ricasha capäcunanpita. ⁴³Paycunaga

runacunapita alipa ricasha caytam munapäcug, nätan manam Diospita alipa ricasha caytachu.

Lapan runacunata Jesús “Chrasquicarcämay” ningan

⁴⁴Chaura Jesusga gayacuypanuymi cay nin: “Pi may si ‘Payga razonpa Diospitam’ nir chrasquicamagga, manam nogalatachu chrasquicaman, antis chrasquiyanmi cachramagnitas. ⁴⁵Nogata ricapamagga, ricapuyanmi cachramagnitas. ⁴⁶Achquinuysi nogaga shamurä cay pachaman, chrasquicamagcuna yanauyagchrünuy si mana juchalanchru capäcunanpagmi.

⁴⁷Nätan maygansi rimangäta mayayar mana cäsucamagta manam ‘Juchanpita cunchuchun’ nïchu. Nogaga manam aywamurä runacunata ‘Jina cunchuchun’ ninäpagchu, antis salvanäpagmi. ⁴⁸Pisi ‘Nogata manam Diospitachu’ nimagga, jinaman willacuyangäta mana cäsucamagpagga cayan jucmi ‘Jina cunchuchun’ ninanpag. Cay willayangämi ushanan junagchrüga ‘Cunchuchun’ nipäcushunqui. ⁴⁹Nogaga manam rimä quiquilläpitachu. Cachramagnï Tayta Diosmi nogata nimara imata ninäpagsi u imata yachrachinapagsi. ⁵⁰Nätan musyayämi Tayta Dios mandanganta cäsucugcuna imaycama cawapäcunantas. Chaura rimaparacayag rimanäpag pay nimangalantam”.

Atendinacurcänäpag Jesús yachrachipäcamangan

13 ¹Pascua fiesta ‘manaragsi galariptilanmi Jesusga nä musyara cay pachata dëjananpag, jinaman Dios-mayincagta aywananpag nä üra ayparayämunganta. Payga cay pachachru runacunata alisca cuyarmi wanura, nätan cuyaras wanungancamam.

²Chauraga cénarcayarämi, nätan chaypagga nämi Simonpa churin Judas Iscarioteta Asyagga tantiarachinag imanaypa Jesusta reguechinanpagsi.

³Jesusga musyaram Diospita shamungantas payman gangalanta cutinantas, jinaman lapan ima-aygata munayninman Dios chrurangantas.

⁴Chaura Jesusga cénarcayaptämi sharcurun iscatarayanganpita. Jinarcurmi catatanuysi chay alisca shumag jatirayanganta jorgorun. Jinarcurmi toällata chegланman watacurun. ⁵Chauraga maylaurcänä gueshpi batyamanmi yacuta wiñarun. Jinarcurmi chraquicunata maylarcur chay toälla watacunganwan chaquichiyta galacuyun.

⁶Nä Pedro nipäcungan Simonpa chraquinta maylananpag chraruptinmi payga cay nin: “Tayta, ¿gamchu chraquita maylamanqui?”

⁷Niptinmi Jesusga cay nin: “Cananga manam tantianquichu cay rurayangäta. Chaypitaran tantianqui”.

⁸Niptinmi Pedroga nin: “Manam gamga imaysi chraquita maylamanquimanchu”.

Niptinmi Jesusga “Mana maylapuptiga manam canqui nogapachu” nin.

⁹Niptin Pedro nipäcungan Simonga: “Chauraga tayta, ama maylamaychu chraquilataga, maylamay maquitawan umätas”.

¹⁰Niruptinmi Jesusga “Nä maylashedataga manam nä maylachwanchu yapayga. Lapansi nä maylasham cayan. Maylashäga chraquilyatam. Nätan gamcunaga carcayanqui nä maylashanuymi mana juchaynag, mana lapay carsi. ¹¹Chaura manam lapaychu mana juchaynag capäcunqui” nirun, nätan wanuchipäcunanpag pi reguechinantas Jesusga nämi musyara.

¹²Chaypita nä chraquicunata maylarcärimarga gangalantam jaticurun chay catatanuysi jorgongan jacunta.

Jinarcurmi yapay cutirun chay micuyangancagman. Chaypitam cay nipäcaman: “¿Tantiarceanquichu chraquicunata imanir maylangätasi?”

¹³Gamcuna gayarcayämanqui ‘Yachrachigpam’, nätan ‘Munayniyogpam’. Chaynuypa gayapäcamar, alitam nircayämanqui, nätan chaynuy captämi.

¹⁴Chauraga noga chay yachrachig, chay munayniyog, chraquicunata maylarayaptiga gamcunas maylapunacurcanquimanmi. ¹⁵Cayta rurayä gamcunas atendinacurcänaypagmi.

¹⁶Mayapäcamay shumag: Maygan rantisha runasi manam mas munayniyogchu rantigninpitaga. Manatan cachra rurag runas mas alinnintagchu cachragninpitas. Nätan noga munayniyogsi cayta rurayaptiga gamcunaga masran rurapäcunquimansi. ¹⁷Chaura caycunata nä musyarcayarga, jinaman rurapäcurga capäcunqui cushisham.

¹⁸Cayta nircayag manam lapaypagchu. Noga musyayämi pïcunata acrangätas, nätan ruracangaran ‘Nogawan micugmi muyunga contrapartinman’ nir isquirbishaga.

¹⁹Cayta nircayag manas ruracaptälanmi, nätan ruracuruptin noga Dios cangäta shumagmi musyapäcunqui.

²⁰Cayta shumag mayacurcay: Pisi cachrashäcunata chrasquicugga, chrasquicayäman nogatam, nätan nogata chrasquicamagga chrasquicuyan cachramagnitam”.

Judas reguechinanta Jesús willapäcamangan

(Mt 26.20-25; Mr 14.17-21;

Lc 22.21-23)

²¹Chaynuypa nircur Jesusga alisca laquisham willarärیمان cay nir: “Razonpacagtam nircayag, gamcunapita jucmi wanuchipäcamänanpag reguechimanga”.

²²Chaura nipäcamaptinga rircanacuytam galacayäri maygäpita rimayangantas mana musyarga.

²³Chaypagga Jesuspa cuyay discipulunga cénayará Jesuspa naupanchru iscatarayarmi.

²⁴Chaura Pedro nipäcungä Simonga sēñasyaraman maygäcunapita rimayangantas tapunäpagmi.

²⁵Chauraga Jesuspa pēchuncagman muyurcurmi yachraylapa tapurü: “Tayta, ¿maygäcunatag cayä?” nir.

²⁶Niptimi Jesusga niman: “Atgag jitagman tantata ogorcachir gongämi canga” nircamarga, uchuc tantalata ogorcachirmi goyurun Simonpa churin Judas Iscarioteta. ²⁷Chaura Judas tantata chrasquiruptilanmi Asyagga munangan rurachiyta galacuyun.

Chaura Jesusga cay ninmi: “Ruranayta ruray wayrala”.

²⁸Niptinga manam maygaläsi chay mēsachru carcayagga tantiyta atipapäcurachu imanir chaynuyta niyangantas. ²⁹Chaura Judas golgue runcu charag captinga waquinniga tantiaräri fiestapag imatas rantimuy Jesús niyangantam u mana imaynagcunata imalatas gomunantam. ³⁰Judas nä tantata chrasquirurga aywacunmi, nätan nä chacagmi cara.

“Cuyanacur cawapäcunäpag” Jesús nipäcamangan

(Mt 26.31-35; Mr 14.27-31;

Lc 22.31-34)

³¹Chaura nä Judas yargoruptin Jesusga cay nipäcamanmi: “Cananmi noga, jana pachapita shamusha runaga reguechicushag imapag aywamungätas, nätan Tayta Diossi reguechicuyan noga rurangäpam alisca ali canganta.

³²Chaura Tayta Dios nogawan ali canganta reguechicurayaptinga, Tayta Diossi quiquinmi reguechinga

runacunata nogas alisca ali cangäta, nätan reguechinga pasay-pacham.

³³Cuyay wamräcuna manam alä unaychu cashag gamcunawan. Gamcuna ashipäcamanquim, nätan chay mandagniquicunata ningänuy niyärishay canan gamcunatas: Noga aywayangäman gamcunaga manam aywamuyta atipapäcunquichu.

³⁴Nätan juc mushogtas niyärishay cäsucurcänaypag: Cuyanacurcanquim jucniquis jucniquis noga gamcunata cuyangänuy, gamcunas cuyanacurcayay jucniquis jucniquis. ³⁵Chaynuy cawapäcuptiquiga lapan runam tantiapäcunga discipulü capäcungayta”.

³⁶Niptinmi Pedro nipäcungä Simonga Jesusta tapurun: “Tayta, ¿maytatag aywanqui?”.

Niptinmi Jesusga “Noga aywangätaga manam cananga gatirämaya atipanquichu. Mas guepäaran aywamunqui”.

³⁷Niptinmi Pedroga cay nin: “Tayta, ¿imanirtag canan mana gatiragmanchu? Nogaga camaricusham cayä gampa janay wanunäpagsi”.

³⁸Niptinmi Jesusga “¿Gamchu nogapa janä wanunqui? Razonpacagtam niyag, manarag gallo wagangancama nämi quima cuti nirayanqui mana reguemangayta” nin.

“Nogam cayä juc caminunuy si Diosman chrächig” nipäcamangan

14 ¹Amar nä, ‘¿Imanashagrag ayganashagrag?’ nipäcuychu. Diosman yupachicurcayarga, nogaman si yupachicarcämaya. ²Tayta Diospa jatun wayinchrüga achcam cayan yachranapag wayicuna. Chaynuy mana captinga nähri nirärgiman cara, antis cananga aywayä maychru capäcunaypagsi camariglam. ³Chaypitam nä aywarurga maychru

capäcunaypagsi nä camarircurga yapay cutimushag. Jinarcurmi noga quiqui chrasquicurchashay gamcunas noga cangächru capäcunaypag. ⁴Gamcunaga musyarcayanquim may aywayangätas, jinaman musyarcayanquitan imanuypa chrämuytas”.

⁵Niptinmi Tomasga cay nin: “Munayniyog, manam musyapächu may aywayangaytas. ¿Imanaypatag chrapäcamüman chay aywayangayman?”

⁶Niptinmi Jesusga cay nirun: “Nogam cayä juc caminunuyshi chayman chrächigga, nogam cayä razoncagta rimagsi, nogatan cayä chay cawachicugsi. Mana nogaman aywamugga, manam pisi chrayta atipanchu Tayta Diosman. ⁷Nogata reguepäcamarga Taytätas reguepäcunquimanmi. Cananpitam nä reguercayanqui, nätan nämi ricapapäcuraysi”.

⁸Niptinmi Felipega cay nin: “Munayniyog, regueyärichimay Tayta Diosninchita. Chaylatam munarcayä manam mastaga imatas”.

⁹Niptinmi Jesusga nin: “Felipe, ¿nä may unaychri cayä gamcunawan, nätan manachu reguemanquirag? Pisi nogata reguemagga, reguesha nämi Tayta Diostaga. Chauraga ¿imanirtag manacayamanqui: ‘Diosta regueyärichimay’ nirga? ¹⁰¿Manachu tantiapäcunqui Tayta Diospa-mayin cayangäta, nätan Dios-mayä pay cayanganta? Rimangäcunata manam rimapapächug quiquipa yarpaynipitachu, antis nogawan cayag Tayta Dios nimangancunatam rimayäsi, rurayäsi. ¹¹Chauraga Dioswan noga cayangäta, nätan Tayta Dios nogawan cayanganta razonmi nipäcuy, nätan mana chaynuy nipäcamarsi razonpa chaynuymi nipäcamay rurayangäcunalapas.

¹²Shumag mayapäcuy cayta: Nogaman yupachicamagga ruranga noga rurayangätam, nätan rurangas mastaran noga Dios-mayäcagman aywacuptiga.

¹³Chauraga ima-aygatas nogata manacarcamaptiqui rurashagmi, Tayta Diosta alisca alipag noga Diospa-mayin ricachinäpag. ¹⁴Nogata imalata manacarcamaptiquis rurashagmi”.

**“Santu Espirituta cachramushagmi”
Jesús nipäcamangan**

¹⁵“Chaura razonpa cuyapäcamarga ningäcunata cäsucurcay. ¹⁶Nätan nogaga manacushag Tayta Diostam juc yanapagniquicunata cachramunanpag, gamcunawan imay aygaysi cananpag.

¹⁷Chay razoncag Espirituta, shongon munangalanta ruragcunaga manam chrasquipäcunchu, mana ricarnin, jinaman mana reguermi. Nätan gamcunaga reguercayanquim gamcunawan captin. Chauraga payga munangantam rurachipäcushunqui.

¹⁸Manam dejapäcushaychu juc wacchacunatanuyga. Cutimushagmi gamcunawan canäpag. ¹⁹Cananpita mana alä unaytam runacuna nä mana ricapapäcamangachu, nätan gamcunaga ricapapäcamanquim. Noga cawaptimi gamcunas cawapäcunqui. ²⁰Chay junagga tantiapäcunquim Tayta Dioswan noga cayangäta, gamcuna nogawan carcayangayta, nätan gamcunawan noga cayangätas. ²¹Pi maysi ningäcunata chrasquicur cäsucugga cuyamanmi. Nätan cuyamagtaga Tayta Diosi cuyangam. Nogas cuyamagtaga cuyashagtan, jinaman reguechicushagmi chay cuyamagwan”.

²²Niptinmi jucnincag Judasga cay nin: “Tayta, ¿imanirtag nogacunalawan reguechicunqui, nätan waquin runacunataga mana?”

²³Niptinmi Jesusga nin: “Pi maysi cuyamagga ningätam cäsucaman. Chaura Dios-mayïga cuyangam. Jinarcurmi Dios-mayïwan noga aywapäcamushag paywan cawag. ²⁴Pi maysi mana cuyamagga, manam noga ningäta cäsucamanchu. Nätan rimayangäta mayapäcungayga manam nogapachu, cayan chayga cachramagnipam.

²⁵Gamcunawan cayälarmi rimaparcayag caycunata. ²⁶Nätan nogapa trucä chay yanapapäcushugniqui Santu Espirituga Tayta Dios chay cachramunanga tantiachipäcushunqui lapan mana tantiay atipapäcungaytam. Jinamanmi yarpachipäcushunqui lapan rimapapäcungagta. ²⁷Payga ali cawaytam yanapapäcushunqui. Nätan nämi nirärig noganuy cawapäcunaypagsi. Cay gasila cawayga manam cay pachachru cagnuylichu. Chauraga ama ‘¿Imanashunrag?’ nipäcuysi ni manchacapäcuysi.

²⁸Nämi mayarärinqui aywayämi ningäta, nätan gamcunawan canäpag yapay cutimunätas. Gamcuna razonpa cuyapäcamarga cushicurcanquimanmi Tayta Dioscagta aywayaptïga. Nätan Tayta Diosga nogapitaga mas munayniyogmi cayan. ²⁹Cayta nircayag mana imas cayangancamalam nä imas captin razonpa rimangäta tantiapäcunaypag. ³⁰Manam nä rimapapäcushaychu aläpa unayga. Nämi nachragayämun cay pachachru munayniyog Asyagga, nätan imata ruramarsi manam munangantaga taringachu. ³¹Chaynuymi ruracänan cayan Tayta Dios cuyangäta, cay pachachru runacuna musyapäcunapag, jinamanga pay nimangannuylam rurayäsi” nircurga, “Sharcapäcuy aywashun caypita” nipäcamanmi.

Diospa wayin puertachru üvas dibujashata ricapur Jesús tantiachipäcamangan

15 ¹Chaypitam aywarcayaptïga cay nin: “Noga cayä razonpacag üvas wiñayagnuy. Nätan wac üvas wiñayagta uryapagnuy cayan Tayta Diosga. ²Payga mana wayugcag palgaycunataga jorgonmi, nätan wayugcag palgaynincunatam pichapan masta wayunanpag. ³Gamcunaga willapäcungagta chrasquisha capäcurmi nä carcayanqui mana juchaynag. ⁴Nogawan chaynuyla cacurcayay, noga gamcunawan cayangänuy. Üvas plantapita tipicarurga manam chay räma quiquilanga atipanchu wayuuta. Chaynuymi gamcunas mana atipapäcunquichu Dios munangannuy cawayta, mana nogawan capäcurga.

⁵Nogaga cayä üvas wiñayagpa tullunnuymi, nätan gamcunam carcayanqui rämacunay. Pi maysi nogachru chaynuyla cayagga, nätan nogas paychru chaynuyla captïga, alisca alim cawan. Nätan nogapita raquirurga manam pasay ima ali ruraytas atipapäcunquichu. ⁶Pi maysi nogawan mana chaynuylacagga, washaman jitarisham canga. Jinarcurmi räma chaquinuysi, palarcur rupachisha canga. ⁷Chaura chaynuyla nogawan capäcurga, jinaman yachrachingänuylla cawapäcurga, munangayta ima-aygatas manacurangaytam chrasquipäcunqui. ⁸Tayta Diosga alisca cushisham cayan gamcuna juc üvas planta alisca wayugnuysi noga ningänuy ali cawapäcuptiquiga. Chaynuy cawarga nä carcayanqui razonpa discipulümi.

⁹Nogata Dios-mayï cuyamangannuy cayan nogas cuyarcayag gamcunata. Gamcunas chaynuy cawapäcuy, noga gamcunata cuyarcayangagnuy. ¹⁰Cay

ningäcunata cäsucurcaptiquiga nogaga cuyapäcushaymi. Nogatachu Dios-mayï cäsucupti cuyayäman chaynuymi.

¹¹Chaynuypa noga rimaparçayag nogata cushicarcächimänaypagmi, nätan gamcunas cushisha capäcunaypagmi.

¹²Chaura cäsucarcämänaypag caymi cayan: Cuyanacur jucniquis jucniquis cawapäcunaymi, noga gamcunata cuyangänuysi.

¹³Alicusa cuyacug canganta tantiachicun pisi, amiguncunapa janan wanularmi. ¹⁴Niyangagcunata cäsucurcarga capäcunqui amigücunam.

¹⁵Manam nä cananpita ricapäcug juc rantisha runatanuychu. Rantisha runaga manam musyanchu rantignin ima rurayangantas, nätan gamcunata nogaga ricapäcug amigücunapagmi.

Chaymi Tayta Dios ima ruranancuna nimangantas nä musyarärichig.

¹⁶Manam nogataga gamcunachu acrapäcamaray, antis nogam gamcunata acrapäcurag maypas aywapäcunaypag.

Jinaman chaynuyla Dios munangannuy ali cawapäcunaypag üvas planta alisca wayugnuysi. Chaura noga ningänuy Tayta Diosta manacurga lapan manacurcangaytam chrasquipäcunqui.

¹⁷Yapay cayta niyärishay: Jucniquis jucniquis cuyanacurmi cawapäcunqui” nirärimanmi.

**“Nogatanuymi
chregnipäcushunqui” Jesús
nipäcamangan**

¹⁸“Nätan Diosman mana yupachicug runacuna chregnipäcushuptiqui yarpachracurcay nogatas chregnipäcamanganta. ¹⁹Gamcuna paycunanuysi lutan capäcuptiquiga chay runacuna cuyapäcushunquimanmi. Nätan gamcunataga nogam acrapäcurag chay runacunachru cayagta. Chaymi chay lutan runacuna

chregnircayäshunqui paycunanuy nä mana capäcuptiqui. ²⁰Yarpachracurcay cay nipäcungagta: Maygan rantisha runasi manam mas munayniyogchu rantigninpitaga. Nogatas

chregniparcayämarga, ashiparcayämarga, gamcunatas chaynuymi jinapäcushunqui. Nätan yachrachingäta cäsucarcayämagcunaga gamcuna yachrachipäcungaytas cäsucurcangam. ²¹Lapan caycunata rurapäcushunqui nogapa capäcuptiquim chay cachramagnita mana reguepäcur.

²²Chay runacuna mana juchaynagmi capäcunman cara, mana noga musyachig aywamuptiga. Cananga nätan chay juchancunapita mana cuyapasham capäcunga. ²³Pi maysi nogata chregnimagga, Tayta Diostas chregniyanmi. ²⁴Mana juchaynagmi capäcunman mana munayniwan paycunachru mana ima-aygatas rurasha captiga. Nätan cananga nämi ricapäcusha ima-aygatas. Chaynuy ricarcayarmi chregnircayäman, jinaman Tayta Diostas chregnircayan. ²⁵Chaynuy jinarcayäman isquirbishacunachru: ‘Mana juchaynagtam chregnipäcamara’ ningan ruracänanpagmi.

²⁶Nätan yanapapäcushugniqui chay razoncag Espirituga Tayta Dioscagpita cachramunäga runacunata tantiachingam nogapita. ²⁷Jinamanga gamcunas rimapäcunquitan galayunanpita-pacha nogawan capäcusha capäcur”.

16 ¹“Caycunata nircayag, nä ima-aygas captin mana nogapita raquicapäcunaypagmi. ²Gamcunataga chay Israel castäcuna gotucarcänan wayipitas gargaripäcushunquim, jinaman chrämungatan maygansi wanurcärichishurniqui ‘Caynuypam Diosta servinchi’ nipäcunan junagsi. ³Chaynuy rurapäcunga mana Tayta Diostas ni nogatas reguepäcamasha

carmi. ⁴Nätan nircayag, nä caycuna pasaptin yarpachracurcänaypagmi”.

**Santu Espiritu rurananpita Jesús
nipäcamangan**

Nircurmi Jesusga cay nipäcaman: “Galayunanpita-pacha mana cayta nipäcuragchu, gamcunawan quiqui carmi. ⁵Nätan cananga cachramagniwän canäpagmi aywacü.

Niyaptisi manam maygalaysi: ‘¿Maytatag aywacunqui?’ nir, tapupäcamanquichu.

⁶Antis cay ningäcunawanga aliscam laquicarärinqui. ⁷Nätan mayapäcamay shumag: Antis aywaptiga alim canga gamcunapag. Mana noga aywaptiga manam aywamungachu chay tantiayta yanapapäcushugniqui. Nätan aywacurga nogam cachramushag payta. ⁸Nä pay aywaramurga Diosman mana yupachicug runacunata tantiachinga juchasapa capäcungantam, Dios ningannuy ali cawaypitam, nätan juchancunapita taripasha capäcunantam. ⁹Juchasapa paycuna carcayan ‘Payga razonpa Diospitam’ nir, mana chrasquicarcämanganpitam. ¹⁰Nätan tantiapäcungam Dios munangannuy noga ali cawangäta. Chaymi nogaga aywayä Tayta Dioscagta. Nä manam nogataga ricapapäcamanquichu. ¹¹Jinaman tantiapäcungam cay pachachru munayniyog Asyag juchanpita ‘Cunchuchisha cachun’ Dios nä niryangantas.

¹²Maymayragchri cayan nipäcunag, nätan cananga manam tantiayta atipapäcunquimanchu. ¹³Nä razoncag Espiritu aywaramurmi ichaga lapanta shumag tantiachipäcushunquiga. Payga manam rimapapäcushunqui quiquinpa tantiaylanpitachu, antis rimanga Diospita mayangantam, nätan musyachingatan mas guepaman ima-aygacuna cananpitas.

¹⁴Payga tantiachipäcushunqui nogata

alawapäcamänaypagmi. Nätan nogapita musyangantam gamcunata musyachipäcushunqui. ¹⁵Chay Santu Espirituga nogapita musyangantam gamcunata musyachipäcushunqui. Chaynuy nircayag Tayta Diospacag ima-aygas nogapa captinmi”.

¹⁶Nircurmi Jesusga cay nipäcaman: “Cananpita ishca y quima junagtaga manam ricapapäcamanquichu, nätan ishca y quima junagtaga yapaymi ricapapäcamanqui. Nogaga aywacushag Tayta Dioscagtam”.

¹⁷Chaura juc ishca y discipuluncunaga tapunacuytam galacayäri cay nir: “¿Ima ninantatag niyämanchi: ‘Ishca y quima junagga manam ricapapäcamanquichu, chaypita ishca y quima junagtaga yapaymi ricapapäcamanqui, nätan aywashag Tayta Dioscagtam’ nirga?

¹⁸Manatag tantianchichu imapita rimayangantas. ¿Ima ninantatag niyämanchi?”

¹⁹Nir tapucuyta munarcayangätam Jesusga tantiarun. Jinarcurmi cay nipäcaman: “‘Cananpita ishca y quima junagta manam ricapapäcamanquichu, chaypita ishca y quima junagtaga ricapapäcamanqui’ ¿ningäpitachu tapunacurcayanqui? ²⁰Mayapäcamay shumag: Gamcuna wagapäcunquim, jinaman alisca laquisham capäcunqui. Chaynuy capäcuptiqui Diosman mana yupachicug runacunaga cushipapäcushunquim. Nätan chay laquirarcayangaypitaga cushicurcanquim.

²¹Juc pachrayog warmichu nä gueshpicanan üra chramuptinga, naupataga nanaywan cayan. Chaypita nä gueshpicuruga gongarunmi chay nanangantaga, wamran näciramuptin cushicurur. ²²Chaynuyi gamcunas cananga laquirarcayanqui. Nätan yapayran ricapäcushay. Chauraga aliscam shongoycuna cushicunga, nätan chay

cushicuyniquicunata manam pisi guechrupäcushunquichu. ²³Chay ricapapacunay junagga manam nä tapupäcamanquichu imatas. Nätan shumag mayapäcamay: Noga ningänuy ima-aygatas Tayta Diosta manacurcarga chrasquipäcunquim. ²⁴Canancama gamcunaga manam noga ningänuy manacurcanquiragchu. Manacurcay, chrasquipäcunquim alisca cushisha capäcunaypag.

²⁵Nätan canancama caycunata nirärig imawansi tincuchiypam. Nätan mana tincuchiypa rimanä junag chrämungam. Chay junagga Tayta Diospita rimapti shumagmi tantiapäcunqui. ²⁶Chay junag noga ningäta yarparcurmi manacurcanqui payta. Nätan manam Tayta Diosta manacushag gamcunapita nipäcugchu. ²⁷Antis gamcunata quiquin Tayta Diosmi cuyarcayäshunqui. Nätan cuyarcayäshunqui nogata cuyapäcamaptiquim, jinaman Tayta Diospita shamungäta chrasquicurcasha capäcuptiquim. ²⁸Noga yargamurä Tayta Dioscagpita. Jinarcurmi aywamurä cay pachaman. Cananga nätan cay pachapita cuticü yapay Tayta Dioscagtam”.

²⁹Nipäcamaptin discipuluncunaga cay nipäcümi: “Cananmi icha rimayanquiga shumag, mana imawansi tincuchilar. ³⁰Cananga tantiarcayämi lapan ima-aygas musyangayta, jinamanga manam pisi tapucushunaytaragchu munanqui. Chaymi ‘Payga razonpa Diospita aywamusham’ nirsi chrasquicurcarag”.

³¹Nipäcuptimi Jesuga cay nipäcaman: “Cananga ¿razonpachu yupachircayämanqui? ³²Nämi nachrgayämun ürä, nätan nagascalam nä carunga. Gamcuna jucpacama wichicapäcunay, jinaman japaläta dejapäcämänay üra. Nätan manam japalächu cäga. Tayta Diosga nogawanmi cayan.

³³Lapan caycunata nircayag nä ushanantam, cay pachachru gamcuna nacatacurcanquiran, nätan valorchacurcay. Nogaga cay pachachru chay juchäcachigta nä yalisham cä. Chaylatam nircärig”.

Discipuluncunapag Jesús manacungan

17 ¹Chaynuy nircärimarmi Jesuga jana pachata rircacurcur Tayta Diosta cay nin:

“Tayta Dios, nämi chraramun üra Dios-mayiqui cangäta runacunata musyachinaypag. Chaynuytan nogasi gampita musyachishag Dios-mayï cangayta. ²Gamga nogata chruramasha canqui lapan runacunachru munayniyog canäpagmi, jinaman nogaman lapan runata aywachimungayta imaycamas cawachinäpagmi. ³Nätan chay imaycamas cawagga canga, gam japalay razoncag Diosta reguepäcushurniquim, nätan noga, Jesucristo cachramangayta reguepäcurninmi. ⁴Nogaga cay pachachru gampita musyachisham cä, lapan nimangaycunata rurangäwan. ⁵Chauraga Tayta Dios, manaragsi cay pachas camacaptilan cangänuynar canansi cashag gamcagchru cushisha.

⁶Nogaga gamman mana yupachicug runacunapita acrarcur nogaman aywachimungaycunata musyachisham cä, gam imanuy cangaytas. Paycunaga gampam cara. Nätan nogatam gomasha canqui, jinaman paycunaga cäsurcusham ningayta. ⁷Cananga musyapäcunmi lapan nimangaycuna gampita shamusha canganta. ⁸Chaura nimangaytaga nisham cä, nätan paycuna chrasquicurcusham. Shumagmi tantiapäcusha razonpa gampita aywamusha cangäta, jinamanga chrasquircämasham. ⁹Chaymi noga manacuyag paycunapita. Manam manacug chay lutan runacunapitachu, antis

manacuyag chay gomangay runacunapagmi gampa captin. ¹⁰Ima-aygas nogapacagga gampam, gampacagsi nogapam, nātan nogata cay runacunaga alisca alipagmi nā ricarcayāchiman.

¹¹Nogaga nā manam cashagchu cay pachachrūga. Nogaga aywayāmū gam cayangaymanmi, nātan cay runacunaga canga caychrūran. Lapan juchapita caruchru cayag Dios-mayī, nimangaynuynar caycunata washay ima-aygapitas munayniquiwān. Nogachū gamwan cayanchi juc runanuyla chaynuuy paycunas mana pasay raquicālar cawapācunanpag. ¹²Cay pachachru paycunawan carga, nimangaynuymi ñawilāchru cahirā cay gomangaycunata. Manam maygansi caycunapita ogracashachu. Ogracarayanga nā ogracasha cayaglam, Salmoschru isquirbisanuy ruracānanpag.

¹³Cananga aywamushag gam cayangaymanmi. Nātan cay pachachru cayālar niyag cayta, noga cushirayangānuuy caycunas alisca cushicurcānanpagmi.

¹⁴Nogaga willasham cā nimangaytaga. Chaymi mana cāsucugcunaga chregnipapācun, mana paycunanuy capācuptin. Nātan nogasi manam paycunanuy lutancho cā. ¹⁵Chaura manam manacug, chay mana cāsucugcunapita jorgonaypagchu, antis manacuyag Asyagpita washanaypagmi. ¹⁶Chaura noga mana lutan captimi, caycunas mana capācunchu lutanamaga. ¹⁷Gamlapag capācunanpag raquiruy razoncagta gampita rimapayangāwan. Gam nimangayga razoncagmi. ¹⁸Nogatachu cachramaray cay pachachru runacunam, chaynuymi nogas caycunata cachrayā cay pachachru runacunaman. ¹⁹Nātan nogaga cāsucurag lapanchru, paycunas noganuy cāsucurcāshunaypagmi.

²⁰Manam caycunalapagchu manacug, antis manacuyagmi paycuna rimaptin mas

guepaman chrasquicamagcunapagsi.

²¹Paycunas lapan mana raquicālar capācunanpag. Tayta, gamchū nogawan cayanqui, nātan nogachū gamwan cayā, chaynuuy paycunas noganchipita mana raquicālar capācunanpag, cay pachachru runacunaga gam cachramangayta chrasquicarcāmānanpag. ²²Gam nogata alipa ricamangaynuymi nogas paycunata ricarā, nogawan gam mana raquicālar cawanganchinuy paycunas mana raquicālar capācunanpag. ²³Nogaga cayāshag paycunawanmi, nātan gammī canqui nogawan, mana pasay raquicapācunanpag. Chaynuypaga cay pachachru runacunaga tantiapācungam gampa cachramushay cangāta, jinaman nogata cuyamangaynuuy paycunatas alisca cuyayangayta.

²⁴Tayta, chay gomangaycunata munā noga canāchru paycunas capācunantam, munayniyog canāpag nimasha cangayta tantiapācunanpag. Nātan gamga cuyayāmanqui mana cay pachas camacangalanpitam.

²⁵Alila rurag Tayta, cay pachachru runacunaga manam reguepācushunquichū. Nātan nogaga regueyagmi, jinaman cay runacunas musyarcayanmi cachramaptiqui aywamusha cangātas. ²⁶Paycunata tantiarayāchimi gampita, imanuy cangaytas. Nātan chaynuylam tantiyāchishag, chay cuyamangaynuyla paycunas cuyanacurcānanpag, jinaman nogasi paycunawan canāpag”.

Wanuchipācunanpag Jesusta charipācungan

(Mt 26.47-56; Mr 14.43-50;

Lc 22.47-53)

18 ¹Chaynuypa Jesús Tayta Diosta manacurcuga, aywara nogacuna discipulwanmi Cedrón

ragra nipäcungä wacläcag chimpanta. Chaychrümi cara juc canchra ima-aygas wiñag. Chaymanmi Jesuswan yaycaräri.

²Jesusta wanuchipäcunanpag reguechig Judassi regueram chay aywapäcungäcagtaga. Chayman achca cutim Jesusga pushapäcamara nogacunata. ³Chaura Judasga chraramun chaymanmi achca soldäducunawan, jinaman Diospa wayinta ricag guardiacuna pushasham. Chaycuna aywarärimunag sacerdöticunapa mandagnincuna nätan fariseocuna cachramuptinmi. Chaura chrarärimun tucuywan achquishacamam, jinaman alisca camapacusha armacunawancamam.

⁴Nätan Jesusga lapan ima-aygas pasananta musyarga aywarcurmi tapurun: “¿Pititag ashircayanqui?”

⁵Niptinmi paycunaga “Nazaretpita Jesustam” nirärin.

Chaura Jesusga “Nogam cayä” ninmi. Jesusta reguechig Judasga paycunawanmi cayänag.

⁶Chauraga “Nogam cayä” niruptinga runacunaga guepatarcurmi ancalarärin.

⁷Chaura Jesusga yapaymi cay nin: “¿Pititag ashircayanqui?”

Niptin paycunaga “Nazaretpita Jesustam” nirärin.

⁸Chaura Jesusga cay ninmi: “Nämi nircayag, nogam cayä. Nä ashircayämarga nogalata charipäcamay, nätan cay runacunaga aywacurcächun”.

⁹Chaynuy nira: “Tayta Dios gomangancunata manam ograshachu cä maygantas” nir, quiquin Jesús rimangannuy ruracänanpagmi.

¹⁰Chaura Pedro nipäcungä Simonga espäda charayanganta jorgarcamurmi Malco jutiyog runapata derëchacag rinrinta muturun. Payga canag Diospa wayinchru mandagcunapa mas mandagnincagpa rantisha runanmi.

¹¹Chaura Jesusga Pedrotam cay nin: “Chay espädata chruracunaman cutiyächiy. Nogaga Tayta Dios nimangancunataga rurashagran alisca cunchunä cayaptinsi” nin.

Anäs jutiyog mandagman Jesusta aywachipäcungan

(Mt 26.57-58, 69-70; Mr 14.53-54, 66-68; Lc 22.54-57)

¹²Niptin chay soldäducunaga mandagnintinmi, sacerdöticuna cachramungan guardiacunawan Jesusta charirärin. Jinarcurmi watarärin maquina. ¹³Chaypitam aywachicurcan chay mandag Anaspa naupanman.

Payga cara Caifaspa suydrunmi. Chay wata cara Caifás chaychru sacerdöticunapa mas mandagnincagmi. ¹⁴Nätan chay Caifasmi cara “Cay Israel castacunapa jananchi wanuchun juc runa” nir mandagcunata nigsi.

¹⁵Nätan Pedro nipäcungä Simonwanga noga Juanga, gaträpärürä Jesustam. Chaura chay sacerdöticunapa mas mandagninpita reguesha carmi, nogaga yaycurü Jesuswanga chay mas mandagcagpa wayin puncuman.

¹⁶Pedroga nätan washa puncuhrümi quëdarun. Chaura chay mandagpita noga reguesha carga, chay puncuta quichrachrag warmiwanmi rimarü Pedropita. Jinarcurmi yaycarachi Pedrotas.

¹⁷Chaura chay warmiga Pedrotam cay nin: “¿Manachu gamga canqui wac runapa disciplun?”

Niptinmi Pedroga “Manam nogaläga cächu” nirun.

¹⁸Jinarcurmi alisca alalaptin, chay rantisha runacunawan guardiacunaga ninata ratarcärichir shayarcayara shanapacurcayar. Chaychru paycunawanmi Pedrosi cayara shanapacurcayar.

Mandag Anás Jesusta tapupangan

(Mt 26.59-66; Mr 14.55-64;
Lc 22.66-71)

¹⁹Chaycama chay mandag Anasga tapupaytam galacuyun Jesustaga “¿Picunam discipuluycuna? Nätan ¿imatam yachrayächinqui?”

²⁰Niptinmi Jesusga cay nin: “¿Manachu musyapäcunqui? Nogaga lapan runacunatas rimaparä runa ricaymi. Chaynuylam yachrachirä Israel castäcuna gotucarcänan wayichrüsi, jinaman Diospa wayinchrüsi paycuna gotucapäcunanchrüga. Chauraga manam imatas nirächu pacayninchrüga. ²¹¿Imanirtag tapuyämanqui nogata? Tapuyga chay mayamagcunata. Paycunaga musyarcayanmi imapita yachrachingätas”.

²²Chaynuypa Jesús niruptinga, chaychru cayag Diospa wayinta ricag guardiacunapitam jucga, Jesusta cäranchru lagyarun cay nir: “Amam chaynuypa ninquimanachu Diospa wayinchru mandagcunapa mas mandagnincagtaga”.

²³Niptinmi Jesusga nirun: “Chaura lutanta rimayaptiga nimay lutan rimayangäta. Nätan rimayangä ali captinga ¿imanirtag lagyayämanqui?”

²⁴Chaura Anasga chaynuy watashalatam Jesustaga “Aywachipäcuy Caifasman” nirun. Chay Caifasga cara Anasnuysi mas mandagnincagmi.

Pedro ishca cuti “Jesustaga manam regüechu” ningan

(Mt 26.71-75; Mr 14.69-72;
Lc 22.58-62)

²⁵Nätan Pedroga chay ninacagchrüran shayayara shanapacuyar. Jinarcurmi cay nirärin yapay: “Gamga cayanqui wac runapa discipulunmi ¿au?”

Nipäcuptinmi Pedroga cay nin: “Manam nogaga calächu”.

²⁶Chauraga chay mas mandagcagpa rantisha runacunapitam, jucga cay nin: “Nogaga ricapurag gamtaga chay ima-aygas wiñag canchrachrüga paywan cayagtam”. Chay nig runaga cara Pedro rinrinta mutungan olgopa ayllunmi.

²⁷Niptin Pedroga yapaymi “Manam regüechu” nirun. Chaura chaylam gallo wagarun.

Mandag Pilatoman Jesusta aywachipäcungan

(Mt 27.1-2, 11-31; Mr 15.1-20;
Lc 23.1-5, 13-25)

²⁸Chaura chay Caifaspa wayinpitaga Jesusta aywachicurcan mandag Pilato cacunan wayimanmi. Nämi warayämura, nätan chay mandacunan wayimanga manam Israel castacunaga yaycapäcurachu “Juchäcurushunmi” nir. Nätan chayman yaycurga manam micapäcunmanchu cara Pascua micuy cänata. ²⁹Chaura Pilatoga chay runacunata tapunanpagmi yargaramun. Chaypitam cay nin: “¿Imatam alisca juyuta juchäcusha cay runa?”

³⁰Niptinmi cay nirärin: “Chay runa mana lutan rurag captinga, manachr gamman aywachipäcamümanchu”.

³¹Nipäcuptinmi Pilatoga nin: “Aywachicurcay, quiquiquicuna juchanta taripapäcamuy Moisés isquirbingannuy”.

Niptinmi chay Israel castäcunaga cay nirärin: “Nogacunaga manam pitas wanuchiya atipapäcüchu gam mana nipäcamaptiquiga”. ³²Chaynuypa nipäcura imanuyta wanunanpitas Jesús rimangannuy ruracänanpagmi.

³³Chaura nipäcuptin Pilatoga cutiyurun chay cacunan wayimanmi. Jinarcurmi Jesusta gayarcu tapurun: “¿Gamchu cayanqui cay Israel castacunapa reynin?”

³⁴Niptinmi Jesusga nin: “¿Chaynuy niyämanqui quiquiquipa

yarpayniqupitachu, icha pisi Israel castácuna nogapita nipácushuptiquichu?”

³⁵Niptinmi Pilatoga nin: “¡Nogaga Israel castachu imatag cayä! Cay castaycunam, Diospa wayinchru mandagcunam aywarayächimushunqui nogamanga. ¿Imatamar alisca juyuta rurayanqui?”

³⁶Nir tapuptinmi Jesusga cay nin: “Noga reyga manam cá cay pachapitachu. Cay pachapita captíga runácuna peliapácunmanmi cara mandagcunapa maquinman mana gopácamanapag. Nätan noga reyga manam cá cay pachapitachu”.

³⁷Niptinmi Pilatoga “¿Chaura gamga reychu cayanqui?”

Niptinmi Jesusga cay nin: “Reymi cayä, gam niyangaynuymi. Nogaga näciräsi, nätan aywamuräsi cay pachaman lapan razoncagta ninäpagmi. Pi maysi chay razoncagta musyay munagga cäsucanmanmi”.

³⁸Niptinmi Pilatoga nin: “Manam canchu imas razoncagga”. Nircur Pilatoga yapaymi yargorun chay Israel castacunaman. Jinarcurmi cay nin: “Manam cay runapaga canchu ima juchansi wanuchiy ninanpagnuyga. ³⁹Gamcunaga nätan cay Pascua fiestachrüga imaysi munarcayanquim cachrarinäta juclaylataga carcelpita. Chauraga ¿munarcayanqui cachrarinäta cay reyniquicunatachu?”

⁴⁰Niptinmi yapay gaparäcurcan lapan: “¡Ama chaytaga cachrariychu! ¿Cachrariyga Barrabasta!” nir. Chay Barrabasga cara reyga contran, imatas lutanta rurapácamunanpag runacuna sucsutagmi.

19 ¹Chaura Pilatoga “Cay Jesusta astipácuy rimacunanpag” nirunmi. ²Jinarcurmi soldäducunaga Jesuspa umanman jatiräripun cashapita

rurasha corönata. Chaypitam jacuräripun yana puca color jacuta.

³Jinarcurmi payman ashuyärrirga “Cushicuynar Israel castacunapa reynin” nir cäranchru lagyacurcan.

⁴Chaura Pilatoga yapay yargorcurmi, runacunata chay nin: “¡Jay! Cananga cayman yargachimushag, cay runa mana imatas juchäcusha canganta musyapácunaypag”. ⁵Nirga Jesusta yargarachin antay antaytam cashapita rurasha corönan jatishata. Jinaman chay yana puca color jacu jacushata. Chaura Pilatoga “Caymi cayan chay runa” ninmi.

⁶Nä Jesusta ricaparärirga, sacerdotícunapa mandagnincunawan Diospa wayinta ricag chay guardiacunaga mandagnincunaga gaparaytam galacayärin: “¡Cruzchru wanuchun! ¡Cruzchru wanuchun!”

Nipäcuptin Pilatoga nira: “Quiquiquicuna aywachicurcay cruzchrüsi u imachrüsi wanuchicarcämuy. Nogaga manam tarichu cay runapa juchantaga”.

⁷Niptinmi chay castácunaga nirärin: “Nogacunapagga cayanmi Moisés isquirbinganchru, ‘Diospa-mayinmi cayä’ nigtaga pitas wanuchipácunäpag. Chauraga wanunmanmi”.

⁸Chay nigta mayarur, Pilatoga masmi manchacarun. ⁹Chauraga yapaymi yaycurun Pilatoga chay wayiman. Jinarcurmi tapurun Jesusta: “¿Maypitag cayanqui?”

Niptin Jesusga upälalam cara.

¹⁰Chaura Pilatoga cay ninmi: “¿Manachu imatas nimanqui? ¿Manachu musyanqui gamta ‘Cachrariysi’ u ‘Cruzchru wanuchipácamuy’ niysi munaynichru canganta?”

¹¹Niptinmi Jesusga nin: “Gampaga manam ima munayniquis canmanchu

imata ruramänaypagsi, Tayta Dios chaynuy munayniyog canayta mana munaptinga. Chaymi gampa maquiquiman nogata chrächimagga cayan mas alisca juchäcusha gampitaga”.

¹²Chayürapita Pilatoga munara imanaypanuysi Jesús cacherariruytam. Nätan chay castäcunaga gaparäcurcan cay nirmi: “Chayta cacherarirurga musyachipäcamanqui munayniyogninchi Cesarpa amügen mana cangaytam. Nätan pisi ‘Reymi cayä’ nigga Romachru munayniyogninchitam mana manchacunchu”.

¹³Nigta mayarur Pilatoga Jesusta jorgarachimun washamanmi. Jinarcurmi tacuyun juchacunata taripäcunancagman, ‘Gabata’ nipäcunganman. ‘Gabataga’ ‘Rumipita rurasha patiu’ ninanmi hebreochruga. ¹⁴Chauraga cara Pascua fiesta ganyannintinmi nä chraupi junagnuy. Jinarcurmi Pilatoga chay castäcunata nin: “Caymi cayan reyniquicunaga”.

¹⁵Niptin paycunaga gaparäcurcan cay nir: “¡Chayta jitamuy! ¡Chayta jitamuy! ¡Jucla niy cruzchru wanuchisha cananpag!”

Nipäcuptin Pilatoga “‘Cruzchru wanuchipäcamuy’ ¿nishag reyniquicunatachu?”

Niruptionmi sacerdotícunapa mandagnincunaga nirärin: “Romachru munayniyoglam reynícunaga. Manam juca pisi mas canchu”.

¹⁶Chaura Pilatoga “Cä cayan. Nipäcamangaynuy cruzchru wanuchun” nirura. Chaylam Jesustaga aywachicurcan.

Jesusta cruzman clävapäcungan

(Mt 27.32-44; Mr 15.21-32;

Lc 23.26-43)

¹⁷Chaypitam Jesusga yargoron cruzninta umrucurcur, ‘Uman tullu’

nipäcungan gotuman aywananpag. Chay ‘Uman tullu’ ninanga hebreo rimaychruga ‘Gólgota’ ninanmi.

¹⁸Chaychrümi cruzman clävarärin ishca y runacunatawan, jucnintam wacläninman jucnintam cayläninman, nätan Jesustam chraupiman.

¹⁹Chaypitam Pilatoga cruzpa umancagman chrurarachira cay nir isquirbishata “NAZARETPITA JESUSMI CAYAN ISRAEL CASTACUNAPA REYNIN” nishata. ²⁰Chay cruzchru isquirbishata achcam Israel casta runacuna leyipäcura marca lädulan captin. Nätan isquirbisha cara quima rimaychrümi, hebreochru, griegochru, latinchru. ²¹Chaura sacerdotícunapa mandagnincunaga Pilatotam cay nirärin: “‘Israel castacunapa reynin’ nirga ama chruraychu, antis chrurayga ‘Israel castacunapa reyninmi cayä nigmi cay cayan’ nishata”.

²²Nipäcuptinmi Pilatoga “Isquirbingäga nä isquirbisham imanuyi” nin.

²³Nä soldäducuna Jesusta cruzman chrurarärirga, jacuntam aypunacarärin juctacama chruscu soldäducuna. Jinaman charirärintan ruyin jacuntas. Chayga cara mana tinquisham, janapita galayur uracama awasha.

²⁴Chaura soldäducunaga lapanmi “Ama lachishunchu, antis mayganchis apacunanchipag chüsarushun” ninacarärin.

²⁵Jesús clävarayangancagchruga cayaram mamansi nananwan, nätan Cleofasa warmin Marias, jinamanmi cayara Magdalapita Marias. ²⁶Chaypita mamanta Jesús ricapururga, jinaman chaychru shayayagta noga cuyay discipuluntas ricaparamarga, mamantam cay nin: “Mama, paymi canga wawayqui”. ²⁷Nätan nogatam “Paymi canga mamayqui” niraman.

Chaypinpita-pacham wayichru atendirä payta.

Jesús wanungan

(Mt 27.45-56; Mr 15.33-41;

Lc 23.44-49)

²⁸Chayta nircurga, jinaman ima-aygas nä isquirbishacuna ruracasha canganta Jesús musyarga, isquirbisha ruracänanpagmi “Yacunayäman” nin. ²⁹Chaura chaychrüga cayara puchgorisha vïnum junta wiñasha alpapita rurasha matichru. Jinarcurmi chaychru juc esponjata ogorcachirga Jesuspa shiminman chaccharcarärichin juc chaglawan. ³⁰Jesús chay puchgorisha vïnuta upyarurga “Ruranäcagta nämi usharü rurayta” ninmi. Jinarcurmi lipurpular wanurun.

³¹Chay junag cara Pascua fiesta ganyannintinmi. Chaura Israel castäcunaga manam munapäcurachu jamana junagchru chay runacunapa cuerpuncuna cruzlachru cananta. Chay jamana junagga cara alisca välig junagmi. Chaymi Pilota “Cruzchru cayag runacunapatanar chrancancunata paquipäcamuchun. Chaypita ashuchipäcuchun” nirärinag. ³²Chaura soldäducuna chrarärimurga manyachru cayagpa ishcaynin chrancantam paquirärin. Chaynuymi rurarärin Jesuspa wacläninchru cayagpatas. ³³Nätan Jesuscagman ashuyurga ricaparärin nä wanushatam. Chaymi mana paquipäcurachu chrancanta. ³⁴Jinatam juc soldäduga Jesuspa wagtancagpa lanzawan tucsirun. Jinarcurmi chayla yargaramun yawarwan yacu.

³⁵Cayta willaparcayag noga quiqui ñawïwan ricasha carmi razoncagta. Nätan musyayäsi shumagmi razoncagta rimayangätas, gamcunas razonpa payta chrasquicircänaypag. ³⁶Caycuna

ruracara “Manam paquipäcungächu ni juclay tullulantas” nir, Jesuspita isquirbisha captinmi. ³⁷Cayantan isquirbishacunachru “Rircarapäcungam tucsiyagta” nishas.

Jesusta enterrapäcungan

(Mt 27.57-61; Mr 15.42-47;

Lc 23.50-56)

³⁸Chaypitam Arimatea marcapita Josëga manacurun Pilotota Jesús wanushata jucläman ashuchinanpag. Josëga cara Jesuspa discipulunmi, Israel castäcuna manchaypam payga mana reguechicurachu. Chaura Piloto “Äri” niruptinga aywarcamurmi apacura Jesusta. ³⁹Chayman chraramuratan Jesusman chay pagaspa aywag Nicodemos, quïma chrunca kilunuy mirratawan äloes ningan tacusha shumag asyag jampicunata apacurcur. ⁴⁰Chaura Josëwan Nicodemoga Jesusta wancurärin, chay mushog sagpi charapäcunganman chay alisca shumag asyag jampita wichiyurmi, imaysi chay Israel castäcuna rurachrapäcungannuy. ⁴¹Jesusta cruzman chay clävapäcungancagchru juc canchram cara ima-aygas wiñag. Nätan chay chracrachrüga caratan juc mëchusi, mushog rurashala. Chaymanga manaran pisi enterrasharagchu cara. ⁴²Chaymanmi Jesusta chrurarärin wayrala, chay lädulan captin, nätan Israel castacuna jamapäcunä junag nä galayunan captin.

Jesús cawacämungan

(Mt 28.1-10; Mr 16.1-8; Lc 24.1-12)

20 ¹Chaura semäna galayunan junagshi goyash yanan yanana Magdalapita Mariaga aywara Jesuspa mëchuncagta. Nä chrarurga, mëchu chapag jatun rumitaga ricapurun jucläman ashushata. ²Chaura

cutiramunag päripa päirmi Pedro nipäcungä Simontawan nogata ashimag. Nogaga carä Jesuspa cuyayninmi. Chaura chraramurga cay nipäcamanmi: “Taytanchitaga mïchupita jorgapäcusham. Nätan manam musyacanchu mayman chrurapäcungansi”.

³Nirärimaptin Pedrowan nogaga aywacurarä mïchucagtam. ⁴Ishcaynïsi aywapäcurä päripa päirmi. Nätan nogaga mas wayralam aywarä Pedropitaga. Jinarcurmi chrarü mas naupata. ⁵Chaura lipuyurga ricapurü chay wancupäcungan mushog sagpitaga pachan wancushalatam, nätan manam yaycurächüga. ⁶Chaypita chraramunmi Simón Pedrosi guepätaga. Payga yaycurun ruyicamam. Nätan ricarun paysi chay mushog sagpicuna cayaglatam. ⁷Jinamanmi ricarun Jesuspa uman wancusha sagpitaga chay waquin mushog sagpicunapitaga juclächru doblarayagta. ⁸Chaypitaga noga yaycurümi. Chaura chayta ricarurga “Razonpam payga cawacämusha” nïmi. ⁹Chaycamaga manaran tantiapäcuräragchu wanurcur cawamunanpag isquirbirayaptinsi.

Magdalapita Mariawan Jesús ricapachicungan

(Mr 16.9-11)

¹⁰Chaypitaga cuticurarä jäturarcayangä wayitam.

¹¹Nätan Mariaga wagayarshi cayara mïchucagpitaga washachru. Chaypitash wagaräcur mïchuta anayun. ¹²Jinarcurshi ricapurun ishca angelcunata yullag jacushatacama Jesusta chrurapäcungancagchru tayarcayagta. Jucagshi tayänag umancagpa, nätan jucninshi chraquincagpa.

¹³Chaura angelcunaga cay ninshi: “Mamala, ¿imanirtag wagayanqui?”

Nipäcuptinshi payga nin: “Munayniyog Jesusnïtam apapäcusha, nätan manam musyächu mayman chrurapäcungantas”. ¹⁴Nir muyurcurshi ricapurun Jesustaga. Nätan manash regeshachu pay canganta.

¹⁵Chaura Jesusga tapurunshi: “Mamala, ¿imanirtag wagayanqui? ¿Pititag ashiyanqui?”

Niptinshi payga “Cay chracra tapäcugchrau cayan” nirshi, cay nirun: “Tayta, gam jorgosha carga, nimay mayman chruramungaytas, noga apacunäpag”.

¹⁶Niptinshi Jesusga “¿María!” nin. Chaura Mariaga muyurcurshi hebreo rimaychru “¿Rabuni!” nir, chraquinta margapacurun. (‘Rabuni’ ninanga ‘Yachrachig’ ninanmi.)

¹⁷Niptinshi Jesusga cay nin: “Cachrarimay. Nogaga manaran jegäragchu Tayta Dios-mayicagman. Antis nimuy runäcunata: ‘Dios-mayicagta, nätan Diosniquicunacagta aywayangäta, jinaman Diosnïman, nätan Diosniquicunaman aywayangätas’”.

¹⁸Niruptin Magdalapita Mariaga aywaramunag tayta Jesús ricapungantawan pay ningancunata willapapäcamänapagmi.

Discipuluncunawan Jesús ricapachicungan

(Mt 28.16-20; Mr 16.14-18;

Lc 24.36-49)

¹⁹Chaura chay semäna galayunan junagmi nä inti jegarpunayaptin discipulucunaga goturarcayarä, chay mandagcunata manchacurga wayi puncucunata shumag wichrgapäcurcur. Jinarcurmi Jesusga yaycarmur chraupicunaman shayuyur saludaräinman “Shumagla cawapäcuy” nir. ²⁰Nircurmi Jesusga shumag

ricarärichiman maquincunatawan wagtanta. Chaura ricaparärirga aliscam cushicaräri.

²¹Chaypitam yapay cay nipácaman: “Gamcuna, ama manchapäcüychu. Nogatachu Tayta Dios cachrrayäman, chaynuymi nogas cachrarcayag gamcunata”. ²²Nircurmi pücarcamurga “Santu Espirituta chrasquipäcüy. ²³Pisi perdonapäcungayga, perdonasham capäcunga, nätan mana perdonapäcungayga mana perdonasham capäcunga” nipácaman.

Tomaswan Jesús ricapachicungan

²⁴Nätan Tomasga chay chrunca ishchayniyog discipulu-mayicunapita mellishu nipäcungäga manam Jesús chrämunanpag carachu. ²⁵Chaypitam waquin discipulu-mayicunaga “Jesustam ricaparäri” nirärin.

Chaura nipäcuptin Tomasga “Manam razonchri nipäcugmanchu. Chay clävu yaycusha maqui mogonta mana ricarga, nätan clävu yaycushaman dödüta mana jatirga, nätan wagtanta mana yatarga” nin.

²⁶Chaypitam nä puwag junag pasashachrüga yapaytag discipulucunaga goturarcarayarä wayichru. Tomás cayara nogacunawanmi. Chaura puncucunas wichrgarayaptinmi Jesusga yaycaramun. Jinarcurmi chraupicunaman shayuyur “Shumag cawapäcüy” nir, saludaräriman. ²⁷Chaypitam Tomasta cay nin: “Maquiman jatiyuy dödüyta, maquicunata ricay. Nätan maquiquita chachayämuy wagtäta yatayunaypag. Amam ‘Yangachr’ ninquimanachu, antis ‘Razonpachr’ ninquimanmi”.

²⁸Niptin Tomasga “¡Munayniyoglä, jinaman Diosnilä!” nin.

²⁹Chaura Jesusga cay ninmi: “Tomás, ¿canan ricamar-ragchu, ‘Razonpam

cawacämusha’ niyämänqui? Alipag ricasham, jinaman cushisham carcayan pisi mana ricapamälär ‘Razonchri’ nigcunaga” nirun.

¿Imapagtag cay libruta isquirbirä?

³⁰Jesusga rurasha ima-aygacunatas achcatam pi cangantas reguechicunanpag nogacuna ricarcayapti. Chay waquin ima-aygas ruranganacunataga manam isquirbishachu cá cay libruchru. ³¹Nätan caycunataga isquirbirayä “Payga cayan razonpa ‘Salvacugtam cachramushag’ Dios ninganmi, jinaman Diospa-mayinmi” nir, Jesusta chrasquicurcänaypagmi, nätan payta chrasquicurur imaycamas cawapäcunaypagmi.

Ganchris discipuluncunawan Jesús ricapachicungan

21 ¹Chaypitaga yapaytan Jesusga ricapachicuruntag nogacunawan, Galilea gochra manyanchru. Chay gochrataga Tiberias nipäcugsi cämi, nätan caynuypam casha: ²Carcayarä Pedro nipäcunganwanmi, ‘Mellishu’ nipäcunagä Tomaswanmi, Galileachru Canaán ningan marcapita Natanaelwanmi, jinaman waugué Jacobowanmi. Nogacunapa taytäcunaga Zebedeom, jinaman carcayarämi ishchay mas discipulu-mayicunawansi. ³Chaura Pedroga “Pescacugmi aywayä” nipäcamanmi.

Niptinga “Nogacunas gamwan aywashun” nirmi, aywacurcä chay büquiman jegarcur. Chaypitam chay pagasga mana pasay charipäcamushachu capäcü ni juclaylatas pescädutaga. ⁴Jinarcurmi Jesusga warag waragla ricacarun gochra manyanchru. Nätan nogacunaga manam musyapäcurächu pay canganta.

⁵Chauraga cay nipácamanmi:
“Wamralácuna, ¿micunanchipag
charirarcayámunquichu pescäduta?”

Nipácamaptinga “Manam” nirárimi.

⁶Chaura Jesusga cay nipácamanmi:
“Atarâyayacunata jitayapácamuy cay
büquipa deréchancagman. Chaychrüga
charipácamunquim”.

Nirárimaptinga jitayarárimümi.

Jinarcurmi chay atarâya chutarcamuyta
mana atipapácüchu, achca pescäduyog
captin. ⁷Chaura nogaga Jesuspa chay
cuyayninga, Pedrotam cay ni: “¡Payga
cayan Munayniyogninchi Jesusmi!”
Ningäta Simón Pedro mayarurga janan
jacun jorgonganta jucla jaticurcurmi
gochraman jegarpurun, Jesusman
aywananpag. ⁸Nätan waquinnícunaga
chrarári gochra manyanman
büquiwanmi, junta pescäduyog
atarâyata garashtarcayámur. Chaypitaga
gochra manyanman cara pachrac
ichriychrünylam. ⁹Nä gochra manyan
pampaman yargaramurga tarirári nina
rupayagtam, nätan ishca acapa
pescädu shanshachru cayagtam,
jinaman juc tantatam.

¹⁰Chaura Jesusga “Apapácamuy
ishcay quima pescäduta chayrag
charipácamungayta” nipácamanmi.

¹¹Chaura Pedroga büquimanmi
jegarun. Chaypitam junta pescäduyog
atarâyata garashtaramun, pachrac
pichga chrunca quimayog acray
pescädutam. Antis chaychica cayaptinsi
manam atarâyaga tipishachu.

¹²Chaypitam Jesusga “Shapácamuy
micapácunaypag” nipácaman. Nätan
maygä discípulus “¿Pimi cayanqui?”
niytaga manam atipapácürächu,
Munayniyog Jesús canganta
musyapácurni. ¹³Chaypitam ashuyamur
Jesusga, tantata aptarcur aypuráriman,
jinaman pescädutas chaynuy.

¹⁴Caywanga nä quimapaypam Jesusga

ricapachicusha nogacunawan,
wanushapita cawacaramur.

Simón Pedrota Jesús rimapangan

¹⁵Nä micaráriptüga Simón Pedrotam
Jesusga tapurun: “Jonaspa churin
Simón, ¿paycunapita maschu
cuyayámanqui?”

Niptinmi Pedroga cay nin: “Au tayta.
Gam musyayanquim cuyayangagta”.

Niptinmi Jesusga “Achrcashtanuysi
cuyangä runäcunata, cananpita
shumagpa michiy” nin.

¹⁶Chaypitaga yapaytan: “Jonaspa
churin Simón, ¿cuyayámanquichu?”

Niptinmi Pedroga “Au tayta. Gam
musyayanquim cuyayangagta” nin.

Chaura Jesusga nirun: “Uyshanuysi
cayag runäcunata michiy”. ¹⁷Chaura
yapaytan Jesusga cay nin: “Jonaspa
churin Simón, ¿cuyayámanquichu?”

Nir cuyanganta quimapaypa
tapuruptinga Pedroga alisca laquisham
cay nin: “Tayta, gam musyayanqui
lapantam. Gam musyayanquim
cuyayangagta”.

Niptinmi Jesusga nin: “Chauraga
uyshanuysi cayag runäcunata shumagpa
michiy. ¹⁸Mayamay shumag: Mözu
carga quiquiquim jacucug canqui.

Jinarcurmi munangayta aywag canqui
maytas. Nätan nä auquinyarurga
ricralaytam chacchayunqui, jinatam juc
jacapushunqui. Nätan aywachishunquis
mana ayway munangaymanmi”.

¹⁹Cayta nira Jesusga Pedro
tantiananpagmi, chaynuypa Pedro
wanunganpa Tayta Diosta alipag
ricapácunanpagmi. Chaypitam
Pedrota “Rashchrüman jaruy” nin.

²⁰Chaura muyurcamur Pedroga,
guepan aywayagtam ricaparaman,
Jesuspa noga chay cuyaynintam, chay
Pascua cénachru Jesusman iscataragtam
“¿Pitag cayan chay reguechishugniqui?”

nigtam. ²¹Pedro ricaparamarga Jesustam cay nin: “Tayta, nätan paytaga ¿imatag pasanga?”

²²Niptinmi Jesusga “Noga munaptüga cayächun cutimungäcamas. Nätan gamtaga ¿imanayëshunquitag? Gam ichaga gatiramay” nirun.

²³Chaynuy Jesús ningantaga, Jesusman yupachicugcunachrüga mayachinacurcasha jucnuypam nogapitaga “Manam wanungachu payga” nirmi. Nätan Jesusga nira manam “Mana wanunäpitachu” antis

niraga “Noga munaptüga payga cayächun cutimungäcamas. Nätan ¿gamtaga imanayëshunquitag?” niypam.

²⁴Noga quiqui Juanmi caycunapita willaparcayag. Quiquitän isquirbirä caycunatas. Jinaman musyapäcunmi razoncagta rimag cangätas.

²⁵Nätan maymaychri cayan juccunas Jesús rurangancuna. Chaycuna lapan isquirbicaruptinga nogapa tantiaynüpa manapishchri cay pachas aypänmanchu chruranapag. Chaynuy cachun.